



梅山集
二十

墓誌銘

廿七

~16
2373
21



和
2873
28-21

梅山先生文集卷之三十九

墓誌銘

司憲府執義任公墓誌銘 并序 ○辛丑

惟任氏遠有代序至知中樞府事竹室公諱弘望以
言議氣節伏一世司憲府掌令西齋公諱徵夏盡言
不諱竟死於忠以竹室爲父西齋爲子者卽故執義
諱河也公志氣骯髒及入臺地不從時議屢被人齟
齟 景廟初服黨人之得罪名義爲 肅廟所擯斥
者與己已餘孽合羣起躑躅勢不可遏人皆斂避不
言公慨然曰吾厚受 先王拂拭之恩而未酬萬一



此吾效忠之秋也首論水原府事李森之罪 批旨
極嚴至舉膽略治績稱詡森公引避曰驕驍放肆者
或似膽略善事要譽者易得治名以 殿下之明猶
不能不眩於阿大夫之求譽耶自 肅廟昇遐時兇
黨陰結宦者朴尚儉縹緲睥睨禍將不測而森實主
之公之爲此所以逆折其牙角也後尚儉伏誅而森
之心跡俱露士類始服其先見初兇徒嗾鄉儒嘗試
以母以子貴之說趙最壽李重茂繼之遍攻勾鈐及
三司俾不敢言換面迭出將以尊崇張嬪諸臺皆引
避公獨云若是者適中其計卽起詣臺論罷捧納兇

疏之承宣於是諸承旨皆迸出無可傳啓者公乃援
舊例白書啓本直請承傳色上徹 闕中震動皆爲
公懼翌日連啓又論承旨任守幹不肯接待之罪又
自傳啓仍爲守幹重茂反噬其後羣兇乘機逞憾壹
反 先王成憲而終不敢變易辛巳 處分者卽公
首先駁遏之力爲多焉屢拜司諫執義俱以前啓有
嫌引避又露章陳戒曰 殿下所以爲國者不過因
諸臣建白勉強應答而已終無自我運用磊落做去
者百工懈怠不事其事漸至於國自國民自民漠然
不相干涉似此氣象已非 先王時所見民安得不

失望而息亂乎竊聞巷談自今不可恃 國家而活
只此一語已極寒心進言者非一二而每每以留意
爲教終不見留意之效其可以服人心乎又曰帝王
之孝與匹庶異不可以踈節論之然人情所同然者
本無尊卑之間於此或有所歉瞻聆易惑可不慎哉
臣自聞朔望祭奠攝行之 教明知 殿下有不安
節爲此不得已之教而 殿下於儒臣陳劄加以未
安之教旋因喚啓爰示悔悟有司之臣惟當仰體悔
悟之美意不宜奉承一時之告言而不復稟定直以
攝行磨鍊有若永爲定式者然夫有疾攝行不過一

時事何可因是而永爲定式優作當然之事乎又言
殿下不得親享今幾月矣 聖體不康因此可知而
終不許診察議藥 殿下縱自輕獨不念 先王陟
降之靈眷顧而隱憂乎伏聞 慈聖氣候日益漸緩
閭巷小民莫不爲憂保護之地亦豈不聞知惟無傳
教不敢先請一日二日尙未得議進滋補之劑此豈
特藥院之責亦惟 殿下責耳又請誅謀害邑倅之
亂民以杜稷化之漸請罷侵虐生靈之守宰以固邦
本之道時 上疾已痼不能省察百度廢弛人心危
疑咸以言爲諱及疏上人皆揮舌曰真諫臣也公憤

懣慷慨幾忘寢食每獨坐作咄咄聲竟以憂成疾卒
于辛丑閏六月三十日距其生庚子十二月二十二
日爲六十二歲是年九月葬于牙山獨醒里從先兆
也公字仲夔豐川人胄于御史大夫澍有諱琦縣監
贈左承旨諱羲之司藝 贈吏曹叅判諱暎生員
贈左叅贊卽皇考三世也皇考娶昌寧成氏司諫汝
寬女舉公公生質穎異性又至孝十歲丁內艱居瘠
如成人事繼妣黃夫人盡誠人不知其非已出皇考
憂公清羸未曾督課而文藝夙就未弱冠試賢庠累
居上游庚申進士丁丑筮仕爲義禁府都事後復拜

歷冰庫掌苑別檢瓦署別提已卯闈文科因同榜換
封事發遂罷全榜公亦置對始皇考與芝湖李公選
爲知己公又與其子聖輝交契篤厚方聖輝科謫興
皇考在禁廬未及悉對人言渠以名父子豈忍爲是
事公亦不忍下石于故舊素不悅者持公父子不已
與皇考同被革職屏處田里謝絕世緣力農桑課子
姪時奉皇考會宗黨飲酒賦詩以爲樂怨悔絕於色
辭雅言吾方恨不能救吾友世以救其人罪我吾甚
慙焉後親益老家益落喟然嘆曰吾終不能餓死空
山與其奔走乞哀以求蔭宦無寧復占一第得寸祿

以養親乙酉中增廣試旋拔至庚寅 上命復已卯
科始拜典籍移禮曹佐郎正郎出爲慶尙都事再除
兵曹佐郎由禮曹正郎除金浦郡守尋遭外艱戊戌
始拜掌令遞拜正言以不苟合當世斥補南陽府使
未幾棄歸間又掌試嶺南異趣者亦頌其公明焉參
選知製教是爲公出處大略也配延安李氏義著女
忠定公貴其高祖也附公墓別有誌生二男四女男
光夏徵夏女長適孟敬大無育次適進士李息信次
適李瀟次適俞性中亦無育時雨許宙妻長房出時
九時八時五徐俊一洪相鳳妻次房出曾玄以下不

盡載公遇遭 明陵盛際若將展布蘊抱而與世抹
撥不克自效晚處言責時值蕤貞奮不顧身必欲瀉
滿腔熱血掌令公常諫以不量時勢公曰不可變吾
初心掌令公泣請以身代之公笑曰義理各自不同
公切而兇徒得志起誣獄屠戮 肅廟舊臣殆盡使
公而在者必不免公而有知豈以免爲幸哉逮 英
廟初服掌令公繼先志抗疏極言時事被羣兇脅持
鍛鍊以致瘐死囹圄然其所以辨 聖誣定國是爲
永世公案者其功盛矣且矢願以身代者竟踐其言
課忠責孝炳然爲家 國之光苟非公傳付之真正

亦何以與此哉如公者洵無愧於父子也公後孫憲
晦既請掌令狀德殿以公幽堂之銘不佞常誦公三
世風節懦衷攸激不克固辭振筆而爲之銘曰
西河炳靈鍾公一門剛爲世傳是祖是孫公序其中
趾美裕昆薑桂成性冰玉持身強哉其矯守經扶倫
鍊金鍛鐵允矣直臣是爲疆毅靡所不伸夷險一節
誠通神天天報其善身名俱全斂此奇氣獨醒之原
琢銘石章用誌崇墳靡敢溢辭玷累公真

學生崔君墓誌銘

并序○壬寅

崔君敬甫日休嘗從余遊愈久而愈可愛恨其晚相

識也一日以其先狀屬余幽堂之銘曰先人生而有
至行範世歿又泯滅而不稱日休甚恫焉敢要一言
爲不朽余無以將之請彌懇遂按而敘之君諱永淳
字起燦新豐人入本朝有諱淑淨執義號梅谷五
傳至贈叅議諱瑞奐贈左尹諱克燁左尹公玄
孫諱致麟有子諱碩彙卽君祖禰也妣原州李氏其
考毅純也君幼而穎悟性於孝五歲而孤哀慟如成
人隨長者上墓拜跪號咷手植松柏歲久成林事偏
母殫誠志物之養僂身之方靡不畢具每先意承順
或有不豫色必繞膝怡愉親濟嘗糞至再割指進血

而未克收效乃澡浴齋心焚香祈天願以身代或減
已年以益母壽母絕而復甦曰夢有人告我以病從
此愈覺來身輕神清因之缺瘳鄉隣咸稱孝感攸致
母癰病常息其適口者輒竭力以致之仲兄被誣受
刑君冒危難籲冤仍隨兄居謫同其憂患及喪仲嫂
與兄及其二女同室共爨拊育諸姪有逾己出居恒
展墓禱丙舍于側與羣兄混處其中教諸子以義方
敦睦親戚雖踈屬必躬自庀喪於朋友亦然是日也
不聽樂食肉皆孝悌之推也及仲兄遘疾而劇君日
夜救護出而邀醫中途承訃號絕幾殊因積哀致病

至不可爲則扶母痛泣哽咽不能成聲而歿卽 純
廟甲午三月十一日也距其生癸丑爲四十二歲墓
于海南藍川里乾坐娶扶安林氏壽天女西河椿後
孫也舉三男日休台休定休君旣種學績文以蓄其
有亦將涵演以肆而厄於短造罔克見就惜哉然孝
悌爲仁之本而實行孚感鄉黨且長胤好學眞篤將
見其卒究遠業而君爲不亡也銘曰
猗歟梅谷有赫其傳君纘厥緒孝友根天孔懷過毀
至不自全于後遺羸將爲儒珍我述其事質于玄宅

守愚李公墓誌銘

并序○甲辰

嗚呼此守愚李公之墓也公嘗登巍科立于朝矣不以官稱而特揭其自號者以平生立名之在茲也公諱承達字在邗又字兼善系出璿源 英陵第八子永膺大君敬孝公諱琰其始祖也世襲封爵珪組相聯至諱奎明鎮安縣監即公五代祖也高祖諱萬樞溫陽郡守 贈參議曾祖諱龍紀 贈吏曹參判祖諱敏朝生員以孝 旌閭 贈持平又 贈吏曹判書考諱淮刑曹判書際遇 元陵久侍近密受知正廟未究登庸而卒判書公有二配坡平尹氏鳳陽女宜寧南氏雲鵬女也南氏舉公于判書公務安任

所而朗慧成性纔學語已辨事是非曲直而一出於公正以故得父母心稍長受業于從叔父老樵先生先生簡嚴少許可而愛公殊絕托以門戶之重詞業夙就弱冠赴省闈累居魁中歲廢舉及癸亥設增廣試士友多敦勸公勉對策發解一時傳誦其文及擢第知公者賀朝廷得人公仍歸玉流山中屢攝堂后不就丁卯除 元陵別檢陞成均館典籍拜兵曹佐郎司諫院正言癸酉拜忠清都事湖西多公知舊而不敢干囑巨室文士有赴試者京外衿紳力誦其名公惡其人不自重排衆議不舉以故世多側目禍

將剝床而不少懼甲戌又掌試海西關節不到試邑
倅卽公切姻也托邑子之爲塾師者公刑其人一路
警服是歲五月一日卒距其生丁亥爲四十八歲知
與不知咸悼惜焉葬于楊州見山卽判書公兆右也
配南陽洪氏道源女吏曹判書處亮後孫也舉一女
適監役洪在兢取伯氏子翼爲嗣翼有子景仁洪婿
女李爽信公天分絕異自然近道端良凝遠表裏澄
澈動遵規矧操執甚固剛介而和平昭朗而敦厚居
恒穆然寡言笑神閑氣定無一點虛浮精華著於顏
貌雅識溢於言辭挹而聽之者心醉而誠服性又篤

孝恆在親側志體之養俱殫其誠親癯晝夜不解帶
南夫人違瘍而欲公割指進血及喪家人皆出避而
獨守殯不離跬步哀毀幾滅性終身抱孺子慕祭祀
必躬檢虔潔忌日號擗如袒括事伯氏待親黨敬謹
舛篤撫養教誨咸盡其宜其身口所須雖少必均分
接人溫而莊處事謹而審往往得人之死力惰慢不
設於容體詬詈不及於奴隸閨庭之內常雍如也雅
懷枯澹於聲色紛華泊然無所好平生不問家人產
業又不以一事干人服食非惡人所不堪而安之若
命及釋褐以靡逮親存不以新息服告榮于家廟有

時宰久要要與共事公曰死當獨死不必隨衆其人
色變遂不復言秉成者多攬掇而終不應嘗講究治
道洞見其損益得失爲時措之宐言議常主寬恕而
至於邪正之辨毅然有不可奪者禍福得喪無所動
心決科十年一不近君而憂愛出於苦衷常誦于忠
肅一腔熱血竟灑何地之語而三復感唏願爲國家
死用遂先公未卒之志業焉不慕榮名世我相忘而
無幾微色亦嘗被登瀛之選持斧之薦而罔及試用
晦身岷巖與世冥絕亦可見雅志所存也公未曾以
學問自居而檢束身心玩繹經典其所以澆體而自

得者有非世儒循名忘實者之所能及焉貧窶到骨
年且向衰而志氣骯髒名論卓犖文章本原經術明
暢典雅而操觚立就不少淹遲尤長於詩藝苑諸公
皆許以曠世希音而散逸不收惜哉筆慕鍾王妙悟
獨造而不屑焉余嘗概論公之終始則遺逸不怨阨
窮不悶如柳士師忠信孚感無愧神明如馬涑水謹
分守命志不屈而身不辱陳后山任疎菴近之謨猷
可以經世文學可以華國正直之節廉貞之操亦可
以模範一世若公者豈非所謂名實純粹文質彬彬
之君子歟余與公有聲伍之好相許爲知己公歿過

三十年而余亦癯朽垂死使我不在世無復知公者矣遂力疾而爲之銘銘曰

有美一士王國之楨繼業繩武科名文聲在公餘事靡足爲榮我服夫公履道幽貞猗乎其質玉潤金精卓乎其操磔苦冰清軒冕倘來匪伊素情塞兌息影玩心高明安時處順克完身名不遇爲遇觀生志平苟充德業昏衢日星天不假年永觀厥成是爲全歸有禪世程玉山峨峨金華泠泠朗月清風如見心靈我無愧辭爰勒隧銘庶幾不朽守愚先生

翊衛沈公墓誌銘

并序○甲辰

坡州之東金屏山之原有枕友而窆者卽故翊衛司翊衛沈公之藏也公幼後十二年嗣子敦永狀其德謁不佞爲銘曰墓而無誌懼無傳信願藉公爲不朽不佞屢辭而懇愈摯於是感其純孝謹撰次而序之曰公諱毅鎮字致弘青松人以高麗文林郎諱洪孚爲初祖三傳至諱德符入本朝封青城伯又三傳至觀察使諱璿棄官自靖於光廟之世扁亭以忌世世比生六臣忘世公有曾孫左叅贊諱光彥受業于靜庵趙先生爲時賢卿叅贊公有玄孫領議政諱之源不仕昏朝爲孝顯兩朝名臣德業俱著寔

公高祖也曾祖諱益成縣監 贈吏曹判書祖諱廷
最知中樞考諱師民直長妣韓山李氏通德郎弘重
之女牧使秉鼎其祖也公以 純廟辛酉中司馬庚
午補 懿陵叅奉遷 宗廟署副奉事尙瑞院副直
長直長義禁府都事北部令敦寧府判官司宰監僉
正廣興倉守翊衛其選也外而爲宜寧楊口比安縣
監癸巳二月二十四日考終于社洞里第距其生戊
子十月十六日爲六十六歲四月二十一日葬從先
兆也配光山金氏通德郎斗榮之女忠貞公雲澤之
曾孫生與公同年歿先公五十年年纔過笄而婦德

夙就稱女士墓在同岡午坐繼配咸安趙氏字鎮之
女承旨重明之孫生先公一年歿先公十七年閨範
貞淑墓在同岡庚坐三配潭陽田氏郡守德顯之女
生後公二十八歲幼先公十一年始權窆于分水院
後遷附公墓亦有淑質至行宗黨咸誦其德俱無育
取族子敦永爲嗣前弘文館校理有男女幼公質純
器厚自齟齬儼若成人而直長公身教甚嚴不使洞
開追逐惟許從好禮者遊公恪遵庭訓循蹈繩墨乙
巳罹內艱有終身慕已未直長公嬰天行之證公亦
患斯疾而強病侍湯嘗糞甜苦躬親扶持靡極不至

至遭喪殫竭誠信終事無憾居憂盡禮侍奠靈筵守制墓廬而毀瘠幾減性事繼妣朴夫人盡孝先意承順供滌灑資衣線恐不及時到老彌篤有異味未嘗先口必取而獻之臨簣以罔克終孝掩抑茹恨焉常洞屬于奉先四時展墓不以衰病而廢塚飾家奠務盡志力親檢濯漑致極蠲潔俎豆所需必點記分排罔或遺漏其有不備雖鬻器用而必辦焉齋沐不設惰容未曾以疾故攝及病革而值喪餘匍匐詣廟侍者力挽公曰雖病不與祭卽如不祭仍嗚咽流涕其至誠追遠類此教稚弟正趨向遂成偉器有孀妹愍

其癸疚同室共爨而庭無間言及終躬庀喪具忉心而後已治家有法度恩不掩義禮以節和臨事慮患防於未然始若無驗輒久而徵焉教子先以不怙曰汝事叔母如母近俗儉薄門庭中鮮保恩義願汝之勿效也喜施予與親戚共甘苦濟其貧病婚喪如不及以逮窮鄉疎屬是故至者如歸暇日設花樹會陳饋以娛之恩愛篤摯溢於談笑居官以不欺君爲第一義爲政務持大體其在比安捐廩賑饑均分而贖給一境賴不填壑民到于今稱之雅好山水公餘觀東海賞楓嶽有遺世獨立之想素不營產業家人或

有勸者公輒解以貧富有命以故典三邑十年田宅無所增環堵蕭然處之晏如也公天賦凝重濟以謙抑任真坦蕩而亦不以鄙俚加人人皆敬服素性寡欲聲色紛華若無覩焉噫公至性質行宜受天祐吉無不利而惜乎有才無命位不稱德是不能無憾於神理而嗣子文學聞望克紹先休妙齡蜚英進塗大闢報施之天於是焉定是不可以無銘銘曰

維青松氏奕世名胄篤生我公笥矣仁厚爲政于家本之孝友澹泊寧靜用全厥守薄試割鷄成績純茂遺愛三郡民呼父母惜未揚庭克展抱負獨葆其真

不獲滋垢報在不食丕隆堂構于以揭美昭穆之阜我薦石章圖垂永久

敬直齋洪公墓誌銘

并序○甲辰

吾徂祖康敬公諱彬德業文章爲麗朝名臣後裔流落關河爲西土望族傳數十世有諱任濟字景尹號敬直齋生稟瑰琦負性帶氣橫逸難制自放於詩酒紛華之場伯氏勸讀小學書渙然省悟曰爲人之道其在學乎始知名教中有樂地又謂爲學惟從師問道可以觀感造就聞漢湖金先生元行爲當世儒宗踵門請教先生聞公前日改度歎曰變化氣質往哲

不才之集
攸難而今君能之真豪傑士因與講誠敬之旨及明德之說曰樂善好義人或與議體認切問他所不及公彌加奮迅自任爲己之學居恒晨起謁廟退處書室整襟危坐研繹羣經及洛建諸書窮晝夜不懈遠近髦士聞風而從學者甚衆潛心化導常戒學者之舍近趨遠處下窺高自大而無實得慥慥乎存心主一素愛山水暇日携冠童超搖泓曄之間暢敘幽情其學以反躬踐實鞭辟向裏爲本務外爲名之事一切不留於心是所云內積忠信所以進德者歟公以正宗十年丙午閏七月七日卒距其生丁未爲六十

歲葬于龍岡神德山申坐公性於孝居內艱廬墓終三年毀瘠幾滅性常慟早孤身不服華侈口不啖珍異事兄如父接人以禮處事以和信順孚于鄉黨莫不薰德而悅服焉吾洪胄于高麗太師諱殷悅至康敬公會孫諱康封益州伯子孫仍系益州後復貫南陽有諱信得訓練院僉正諱疇九卽公祖禰也妣晉州金氏泉鎮女公有二配晉州姜氏萬尚女清州金氏萬維女俱窈龍岡栗峴龍彥元配出龍獻龍健龍顯李缺肅妻繼配出龍彥男尚根女李同一金大屋金尚龍林孝元龍獻系子尚柱龍健男尚柱尚贊尚

權尚禎女尹在敦金錫老關西之學肇自仁賢之教
而鮮于遜庵倡明斯文中間作者寥寥乎無聞雖欲
聽仁義道德之說孰從以求之哉公能自得師知所
依歸篤信好學用自樹立卓然爲一路之善士雖因
天質之美亦可見學問功大也公之孫尚贊從余遊
其真心質行有乃祖之風焉謁余以不朽之圖已積
歲年而癯淹垂死不能涉筆尚贊臨歸苦懇誠溢于
辭遂力疾而爲銘曰

有美一士其人如玉革舊圖新自知勉學步趨唯諾
無思不服立腳踏實未見其止尊信師訓之死不貳
庶幾夙夜無忝先懿我題其墓表以處士自號敬直
詎敢溢美勒銘玄隧用勸來軌

處士慎公墓誌銘

并序○己酉

靈巖郡東槎谷有坐坎之原卽故處士慎公諱聖弼
衣履之藏也閱百世而無墓銘公五代孫在夏抱狀
謁銘於不佞不佞病閣筆研久矣在夏相守苦懇要
以準請爲度感其深誠遂力疾而敘之公字汝賚敬
庵其號也始祖恭獻公諱修以宋開封府人隨海舶
東來仕高麗有子諱安之兵部尚書事載麗史後受
貫于居昌入 本朝有諱幾寶文提學學問志節爲

鄉邦所慕立祠以祭之子諱後庚通禮隨婦翁烟村
崔公德之居靈巖永保村子孫遂世居焉累傳至諱
喜男觀察使以文學清謹著名亦祭於社是爲公高
祖也會祖諱餘慶判官 贈左承旨祖諱誠監察考
諱光翊成均生員甲子舉義旅妣延安李氏縣監泰
吉女文清公後白其曾祖也公器度儼然孝悌天植
養親備物極其滋味致雪鯉夜雉之瑞愉色婉容未
或少懈雖有憂戚強笑語用寬親心母夫人晝燭數
十年不見天日邵齡癯病公不解衣帶嘗糞甜苦以
驗劇歇斷指灌血用延危喘又築壇祭北斗祈以身

代歷七晝夜不避風雪及喪哀毀逾制幾滅性墓所
稍遠而不廢日省號絕不能成聲行路垂泣樵牧咨
嗟咸稱慎孝子制除而述記哀文用寓追慕一鄉舉
公行誼道伯將聞于 朝公力挽而止事載邑誌公
以 肅宗甲寅卒距其生丙寅爲四十九歲配高興
柳氏 贈叅判重輝女有男壽萬女適崔抗繼配全
州李氏 贈叅判重美女男義萬憲萬濟萬載萬龜
萬女適吳大輔昌言義萬出昌鼎昌恒昌漸憲萬出
昌遠濟萬出昌觀昌晉龜萬出昌鼎子師心師典昌
恒子師顏昌漸子師訥昌遠子師中昌觀子師國昌

晉子師元玄孫以下不記公生長名門惇行孝友爲一方模範者原于學問其所論辨往往有濳造獨詣者大爲士友所推調且於程子存養德性之說用力真篤因以敬自號有零稿可傳有本者如是夫在夏兼示素隱公遺稿素隱公名天翊卽公從父而公長胤壽萬爲其孫焉素隱公清名雅望表準士林而公之行治得於素隱之教焉往哲云稱人之善必本其父兄師友厚之至也竊附斯義爲公之銘銘曰躬行孝悌在先母忝德厚流光裕後無憾本之則存得諸觀感仰述素隱庶幾弗僭矢辭于銘用昭玄炤

息齋張公墓誌銘

并序○甲辰

我朝文教昌明儒賢輩出西北豪傑往往聞風而興在關西者曰鮮于遜庵挾在關北者曰李松巖載亨尤齋漢湖兩先生或銘其墓或狀其行以發其潛德以余所聞海西息齋張公先二公作其學不由淵源師心自得以扶植斯文啓迪後學爲己任是亦豪傑之士而不獲被爾先生所表章名湮滅而不稱惜哉公諱可順字子順系出結城以高麗政丞諱夏爲遠祖曾祖諱厚典農寺尹與 莊陵六臣友善六臣死托旨不仕祖諱毅訥進士考諱裕叅奉公娶慶

州李氏壽仁女舉公于鳳山里第公天資粹美孝友
根性立身制行壹遵朱子訓居憂廬墓終喪朝夕哭
奠未曾以風雨廢遭 國哀行方喪盡禮與花潭徐
公結道義之交多所講明 明宗朝薦拜 健元陵
叅奉不就 嘉靖己酉正月八日卒距其生癸丑爲
五十七歲葬于同郡卧嶺向兌之原配光州金氏勝
錫女三男綱紀緯綱子終錫女適趙雲祥紀子友仁
友義友禮緯子友武友諒雲翰得祿雲翕雲翹雲翹
終錫出公生有異質柳相順汀見而奇之稱以孺孔
聞于朝 中廟招見問居家何爲公對以朝夕養親

之節 上曰真海東名士孺孔之稱不是過也復問
帝王得失之所以然對曰涵養氣質薰陶德性則萬
民歸仁反是則萬民歸怨以故接賢士大夫者明主
堯舜是已親宦官宮妾者庸主桀紂是已 上笑曰
如予何如主對曰行堯則堯行桀則桀在 殿下自
顧其行不必 問臣時公年八歲遂遷于故山厲志
爲學研繹羣經靡不博洽尤專門大易作爲終身家
計所著述甚富盡逸於兵燹惟人事尋緒目一書獲
全其書始言性命終言庸行天德王道靡所不該非
可以私于一家者也 肅廟朝因筵臣言取覽其稿

袞以生於海隅蔚爲儒賢特 贈戶曹正郎嗚呼海
西之俗業弓馬殖貨利不知有詩禮公奮起其地不
囿於風氣能自樹立標準一路著書垂世以牖後人
故骨朽而名傳被 聖朝曠世之遇受士林俎豆之
報者苟非公其積力久亦何以致此哉後公三十餘
年粟谷李文成公卜居海山之陽倡明道學學者翕
然從之猶有絃誦之風是固文成之力而公之功化
亦有以啓之歟余嘗得公於東儒錄而恨其微而難
徵公後孫在烈齋公遺事乞誌其隧余不敢以瘞病
垂死辭特表其先倡之功如右系以銘曰

吁嗟張公崛起海隅西方之美匪直珣玕靡所傳習
自準步趨冲齡近 君視遇特殊返我初服不涉名
塗韞積自藏畢生不沽觀善強輔厥德不孤陶冶士
心俾由型模鼓篋叩鐘終始不渝崧彼立峯俎豆有
區曠時 徵稿 恩契永孚嗚呼可忘有斐 聖謨
遺書在篋惟德之符扶世作教嘉憲是鋪臥嶺之阡
斂寂若無我銘其實厥聲覃訃有拱塚木式哉海儒

瑞興府使朴公墓誌銘

并序○丙申

吾先師近齋朴先生有肖子曰瑞興府使諱宗興字
元得先生道德爲世儒宗以尊聖人攘夷狄爲己任

秉義自靖辭宮僚之命 天怒大震禍且不測舉家
惶惶泣諫勉出而公獨仰贊彌力終成其完節焉逮
公筮仕不佞叩其去就公曰吾家自有世守底義理
欲無出不佞曰充類至義雖沒身自廢而無悔必量
而後動親懿皆勸以不仕無義公黽俛從宦而悒悒
不樂常存忍痛含冤迫不得已之意以畢其生若是
者可不謂善繼人之志者耶公潘南人先世文正公
諱尙衷以德業節義顯麗季八 本朝平度公諱崑
以功烈著累傳至文康公諱紹道學爲己卯名賢所
推重號冷川先生公其九世孫也後有諱泰遠黃州

牧使

贈吏曹叅判諱弼履通德郎

贈吏曹判書

諱師錫公州牧判官

贈左贊成卽公高曾祖三世

也贊成公有二子長諱胤源卽近齋先生次忠獻公
諱準源也先生配安東金氏處士時篔之女文忠公
尚容其先祖也以 英宗四十二年丙戌十一月二
十一日生公是日陽至也贊成公取來復之意錫小
字先是金孺人夢碩果有娠故先生取剝之上九而
命名焉聰慧絕倫受學于先生聞耳目者不復忘未
勝冠已沉潛六籍治博士業尤工於詩儷以親命應
舉而於得失澹如也及永感而遂廢癸亥拜 康陵

卷之三十一
參奉因忠獻公推恩也公以國法先子婚而後弟姪讓于從弟忠獻公切責不許公壹心營職嘗歎寢園儀物疎略累牒宗伯得稍備乙丑換童蒙教官官每自求童蒙公恥之未嘗自求丙寅陞漢城府主簿莅訟公明關節不行丁卯移景慕宮令換儀賓府都事除洪川縣監未半年換高陽郡守郡有貴戚家廢庄爲居民墾闢者餘百年道伯要還本主公以厲民不聽理竟引嫌決遞戊辰拜司饗院僉正己巳除大興郡守尋換延安府使邑濱海商舶湊集俗趨利健訟公莅之以仁明值歲惡殫心賑濟蠲廩以補之

民無捐瘠俸米餘者吏欲按例售高價公責曰爲民長者詎可賭利命從輕而利民民大悅辛未冬清北亂作勢急燎原公援李月城廷菴故事講究守城之策指揮已定旋遞癸酉除瑞興府使邑處孔路且經荐饑公竭力矯揉至忘寢食從兄參贊公移書戒之公曰欲盡分憂敢恤我躬收糶餘逋一路咸報竣上司而公獨首實請勦因積瘵成疾卒于任所卽乙亥二月十八日也享年五十返葬于揚州蘆原面烽火峴坐丑原元配韓山李氏奎復女先生述墓銘用著孝敬移柩于墓左繼室慶州金氏舉一男一女女歿

男雲壽前府使府使男齊近進士女幼公天資清粹
表裏洞徹自幼薰襲觀感不離典刑事親以志爲養
有執玉奉盈之敬菽水屢空而樂意融融先生有不
豫色輒免冠而伏不命退則不敢退趾襪起居未或
人代先生嘗有血證公必浣滌厠踰手指皴裂輒覆
之以袖不俾先生見焉先生積淹床第侍湯焦熏號
泣晝夜及易簣割指進血量指尺製浚衣校心於終
事博求宅兆五月始克襄哀毀幾滅性嗣子患痘疹
瀕危俗忌饋奠舉哀焚香咸勸以姑停而行之不疑
且以處內室不親視疾忠獻公責以不近人情始入

診遮屏幃存內外之限其嚴於禮防如此力疾述先
生言行流涕沾紙俯觀感泣遂成一部實記備永世
考信焉事忠獻公如父省定不避風雨事無大小必
稟而後行忠獻公許爲父子間知己嘗云不言於吾
兒者於汝則無隱在禁直輒移書以道思想之意及
歿公悲慕不已語及必嗚咽與從父兄弟相須如同
氣氣味不齊而怡怡如也待庶母篤厚而敬施及宗
族姻戚真意藹蔚咸得其歡心教子以義方有過不
少貸公自幼善病殆欠少康而不廢佔畢文理密察
極深研幾其學不驚高遠惟於日用常行隨處繩檢

罔或弛放用心過苦臨事思繹得正而後已謂人道
所重莫過於禮講究雜服酌古今該本末人多就正
公既自盡于身又不憚指導俾各率禮無憾焉自奉
寒儉往往有大不堪者而無難色入其室者僂覺清
風滿座方公門闈之盛也當路者或勸公凌科或擬
公儒爵公笑曰經術非所擬議榮顯亦非素願當是
時左右攬掇若不能自在而塞兌遵晦不通賓客玉
雪自持不染點塵常自策礪或恐有違於先矩是所
云名節之士知廉恥修禮讓不利於苟得不牽於苟
隨惟義之所處者歟公篤於故舊而以不佞夙供灑

掃於先庭視遇如骨肉俾述先生狀德之文文未及
就而公遽歿矣及已屬藁靡所就質俯仰今昔不勝
愴慟雲壽謁不佞以幽堂之誌以知德者潑也哭公
三十年賞音永絕靡我銘公何以舒終身不鼓琴之
恨乎遂為之銘曰

樂有賢父固難為子猗歟我公克趾先美矢心秉執
踐述志事所秉維何尊攘大義出處雖殊終歸一致
先立其大有裕厥懿沒齒願言一箇是字千駟萬鍾
非我素志斂却英華晦身祿仕不激不渝是安素履
詎但稱家允矣國士蘆山老柏歲寒不死死生順寧

可質神理琢辭紀實載納玄隧我銘不諛用報知己

禮曹正郎金公墓誌銘

并序○乙巳

明陵嗣服之初以大行在殯停講對諸臣迭諫而
靳許時有郭世權者受羣壬指嗾誣訐尤齋宋文正
公語極凶悖臺臣請屏裔而亦不從禮曹正郎金
公光瑨喟然嘆曰二者爲今日莫大之憂是係國
家興替曷可以官微而不言遂抗章極論曰君德成
就必資於學故古聖王必以懋學爲急務雖春秋鼎
盛志氣堅定之後尙且孜孜學如不及况在冲年尤
豈容一日少緩明宗宣祖皆於卒哭前因儒臣

建白許令開講茲豈非列聖貽謨燕翼之意而

殿下之所當法者乎殿下聖質生知高出百王春

秋尚幼見聞未廣而日用之間萬幾沓臻苟非學問
之功開明知識涵養性情則其何能端本清源以爲
及應曲當之地乎且殿下明年則已及志學之年
而爲學之道不進則退雖在閭閻士子苟不及強勉
則猶懼其後時况殿下以一身任宗社生民之重
今日之學與不學實係國家安危之幾何可膠守未
節不思通誼坐失難得之光陰乎判府事臣宋時烈
學有淵源早負重名蒙孝廟拔擢之私被三朝

知遇之恩白首林下一心憂國今日 殿下之所倚
重士林之所宗仰者孰有如時烈者哉郭世權乃敢
托以 先王之遺意倡爲次第按法之說欲陷之於
不測之地噫嘻此其意豈但爲一時烈而發也必欲
網打忠賢魚肉士林空 殿下之朝廷而後已其爲
計可謂慘矣在 殿下明示好惡之道放流之典亦
云未減而乃以停舉薄罰略示譴責兩可爭執 俞
音尚闕臣恐 殿下於辨別賢邪之道有未盡也夫
賢邪之分如黑白之不可相混薰蕕之不可相雜故
古聖王察之惟恐其不精辨之惟恐其不早知其賢

也則任之勿貳知其邪也則斥之勿疑使君子有所
恃而得以盡其忠小人有所畏而不敢逞其詐一有
不辨則必至於是非混淆用舍乖宜馴致戕害士林
敗亂國家而終莫之悟者有之可不懼哉今若痛斥
世權顯加放流之典使一國之人咸知 殿下有疾
惡之嚴辨邪之明則奸邪自當屏息朝著自當寧靜
不然臣恐怪鬼之輩必將偵伺希望接跡而起而朝
著無時可靖矣疏八 下嚴批罷職公屏田野無怨
悔色及尤齋造朝公亦起自幽廢重拜泮職進退屈
伸與尤翁同是所云附驥尾而行益顯者歟公字晉

王系出光州有諱自賢備巡衛郎將子九罔文科主簿坐事徙吉州仍居焉累傳至諱國祥諱景憲以孝薦授富寧府訓導諱好謙即公三世也妣陽川許氏彥壽其考也公生稟聰慧日誦數千言既長彌自刻勵博通六籍 孝廟甲午中明經科歷官內外禮曹正郎戶曹佐郎成均館直講司藝兼春秋記事官編修官輸城察訪洪原縣監三和縣令餘不盡記公處官恬約自守所至得民心愛戴如父母莅洪原 顯廟仍繡啓褒諭曰爾生長本道頗解物情衙眷甚少自奉亦簡小心奉職爲政詳明志在愛民補大同之

役衣軍人之寒者民皆稱譽誠爲可嘉仍賜表裏一襲 異數也雅慕趙重峯先生尋其鵬舍遺躅洪原章甫爲重峯建祠公喜曰此吾志也捐廩供役隣俸聞風競勸助竣其事亦可見公尚德崇賢之誠也及謝三和之紱不復跡京師優遊林泉十餘年而卒即戊寅三月十二日也距其生乙丑爲七十四歲始窆于臨溟驛東山遷于時典里午坐從先兆也配慶州崔氏通德郎吉男女附公墓舉七男一女男萬英通德郎萬雄萬戶萬杰承議郎萬最武科折衝萬宗萬式萬泰皆通德郎萬泰以文鳴世女適玄允章公奮

起遐陬蚤自樹立雖在下僚苟可以裨補君德必抗
言不諱不嫌其出位庶幾進思盡忠退思補過者歟
至若衛道闢邪擯斥而靡悔者亦可驗見徹而守確
也公負性帶氣愛好名節尊尙尤齋亦出苦心豈非
以志氣相感而然哉公六代孫璣衡百舍重繭累請
幽堂之文璣衡好學克紹先休余既服公風烈又愛
其肫誠遂力疾而爲銘曰
尺疏顛闡踔乎氣節格玉扶賢矢志心苦切克遂初服
永謝簪笏身名俱完粵與倫匹德厚遺贏天祐其吉
納銘玄隧百世可質

吏曹判書諡貞簡閔公墓誌銘

并序

閔氏望驪興者傳序數十積德累仁至訥齋老峯屯
村三賢而益章砥行立名爲世模楷訥齋公有子諱
鎮周克趾先美望實俱邵古人云人樂有賢父兄亦
樂有賢子弟於乎懿哉公字孺文系出高麗尚衣奉
御稱道珪組奕寫高祖諱汝健長興庫令曾祖諱機
慶州府尹祖諱光勳江原道觀察使訥齋公諱著重
大司憲三世俱 贈元輔妣 贈貞敬夫人豐山洪
氏府使霽女文敬公履祥其祖也公生稟絕異器量
沉毅行治篤厚與伯氏叅奉公夙著盛名時人稱爲

雙璧中癸丑生員蔭補冰庫別檢以 仁顯王后嘉
禮儻者陞活人署別提轉宗簿寺主簿出監平康縣
肅宗甲子闡文科拜禮兵兩曹佐郎司憲府持平始
四學儒生以尹拯與人書語侵李文成公聲罪致討
四館及泮任黨拯者反施罰遂致疏啓迭詆朝著不
靖公調停其是非 上雖不從其啓而引避則優容
特命出仕遞拜兵曹佐郎還持平又轉兵曹正郎間
爲持平承 命按廉關西跋涉邊塞數千餘里備嘗
艱險恤民隱嚴邊禁所論列多見採施選拜弘文館
副修撰校理副校理八對又陳西土民瘼因言沿江

地徵王化未洽請交差文武倅俾盡撫綏 上從之
歷司諫院正言獻納吏曹佐郎校書館校理常帶知
製教時黨人甚伎士流輒目公家以戚晚公力辭銓
郎大臣陳達督出終不膺 命屢拜銓郎副修撰漢
學教授時羅良佐等稱以爲師伸辨誣辱尤菴先生
語絕悖 上竄良佐拯黨李宐昌疏語尤懼公以爲
宐昌訛毀儒宗實斯文大變嚴斥之崔錫恒附會宜
昌侵詆大老益無憚公舉此斥遞之湖南科主試者
權持以拯徒出策題顯嘲儒賢公遂請并罷諸試官
泮官嘗誣栗尤兩先生不敢謁聖廟冒羞行職公糾

發汰去羣小益仄目兼中學教授移副校理屬上
命上相加上至六大臣金公壽恒李公端夏請對稟
旨以趙師錫拜相公慨然曰置相大事而如是苟且
遂投疏略曰人君之任莫重於論相大臣之職惟在
於薦賢一日之內六加枚卜舉措顛倒聽聞駭惑
殿下注意賢德將降大任何不豫曠咨明揚反使摸
索若是苟艱此豈殿下思得賢佐之意亦豈古大
臣以人事君之義哉如使後世以爲口實其爲國家
害何如哉受殿下耳目之寄者無一言匡救亦
殿下獨運乾綱不恢言路有以致之仍及官方之濫

刑獄之失 上始溫批忽 下嚴教候院玉堂相繼
救解頌左兩相疏言朝家舉措不能盡善則此等議
論安可無也 聖教出於慰安右相而恐未察其本
意也都憲李公秀彥疏揀益力 天怒愈震至曰唱
和前後論議層生其愚弄國家輕蔑大臣在國法斷
不可模糊處之人皆爲公危怖呈告見遞會有北關
持斧之 命凡關防設施軍民疾苦無不爬櫛陳列
而壹遵老峯公餘規吉州趙重峯俎豆亦老峯接道
時所創也因公所達 賜額致祭 徽陵卜葬爲都
監都廳歷副應教掌樂院正敘敦匠勞陞通政叅知

兵曹出爲茂朱府使 仁顯后遜位士禍滔天遂投
紱歸甲戌夏化觀察慶尚道旋擢嘉善江華留守時
將築文殊城廟議俾公管董 上引見曰江都國家
所恃卿往善爲之公殫誠經紀城堞旣新繕械練士
克備綱繆陞通津爲府使以金浦軍丁移劃江都俾
守列壑又設伽藍募入緇髮儲兵宿糧措畫中窳翌
年移兵曹叅判廟堂方講定文殊守城節目啓請仍
任未幾內遷大司諫始南九萬力護國賊希載國論
大起忌士類在朝多出諸外公嶺藩及沁司實見擯
也及還朝臺官吳命峻疏論金公鎮圭盛斥戚里權

盛公不自安陳章乞免兼活人署提調拜兵曹叅判
都承旨大司諫禮曹工曹叅判副摠管同知義禁府
成均館事薦爲平安道觀察使時西關荐歉公私俱
赤辭陞日請畱江都移轉米在本道者補賑又貸營
儲銀錢及江都木綿販殖取贏又移海西船粟且自
備四萬餘石劃倭列邑計口分哺餘者別置賑賙庫
用備不虞旱灾復酷 上命致祭城內飢民死者公
馳啓五載設賑西路孔甚請於本道南北別爲降香
用慰溝壑之冤又留意簽政得壯丁萬餘改編爲十
部兵并與遼軍馬兵分作左右隊西陸軍制始有定

規纜畢賑衆瘼紛飭公整頓簿書釐革宿弊因左相
尹趾善疏至被削黜先是以歲饑禁道臣雙轎會迎
虜使備儀公亦從衆乘轎非獨犯也箕營有泉流庫
爲使行策應設而舊規殖貨取用玉堂尹趾仁欲假
此擠陷疏論該庫別將李徵文貸灣人二萬金請警
責道臣 命道查逮啓聞貨財出入俱有的據遂不
售其計敘拜都承旨禮曹叅判漢城府左尹并辭遞
持平李坦襲趾仁疏請索十餘年監司重記嚴覈施
罰弼善丁時潤踵坦起語益凶悖應教李公健命陳
疏發其情狀 上是之歷都憲戶曹工曹叅判以副

价赴燕間除同中樞還拜左右尹兵曹叅判副提學
吏曹叅判時從弟趾齋公陳章忤時議尹趾善宋徵
殷等謂戚畹不宜居要地語極危險公懇辭曰玉堂
論奏無非臣等之藥石每聞公議怵然知危并與槐
院籌司諸任一切丐免疏幾十上迫於 嚴命黽勉
出膺旋又引入改大司成吏曹叅判同知成均館事
擢拜兵曹判書兼備局有司右副賓客司譯院提調
公勞悴成疾請急不許 特遣掖隸 賜駱粥問疾
仁顯后議藥廳設強疾叅 候班顧不能供職湖嶺
兵閫久不出代大臣請令次官議長官差送公又陳

疏乞寢次官問議亟遞職名用存國體久之以大臣
言蒙遞由都憲拜吏曹判書兼尚衣院提調秋擢拜
判義禁府事時有科獄獄囚中有嫌不可按覈者疏
陳情勢 許解公舊患風痺暴發卒于白門外居第
正寢庚辰八月二十四日也去其生丙戌爲五十五
歲計聞 上震悼別賜喪葬諸需 東宮又命擇送
棺板遣官官弔之 仁顯后寢疾方劇送中官慰問
越三月葬于驪州三田洞壬坐後以胤子參原從勳
贈議政府領議政公豐貌美鬚髯氣度莊重涵濡於
詩禮之教遵蹈繩墨內行純篤荐遭喪威母夫人哀

傷成病晝夜扶護躬執刀圭及丁巨創守制窮峽禍
僭百罹家計荒寒而饋奠哭踊情文備至弟妹冲幼
提挈誨諭藹然其愛弟又天有遺腹子撫育有踰己
出伯氏無嗣贊成公以公第一子爲後未娶而殤公
時有一子承洙諸父兄不忍又令出後公曰宗事爲
重我則設無嗣續寧爲班附人莫不嗟歎老峯公棹
棘西塞兇徒方請加律公倉皇赴省中路得病行不
少淹與從弟丹巖公同其間關請少調息終不聽丹
巖公雅言此事曰其至誠不可及老峯公疾革公與
其子文孝公日夜侍側三年不解帶夫人產病濱危

亦不暇顧兒生二齒未得一視而聞其夭奉先追遠
極其誠虔晚嬰奇疾而必參大小祀享臯復前日祖
妣諱辰晨起拜廟平居無疾言遠色不言人臧否罕
與人追逐每憂門闌隆赫兢兢若執玉奉盈屢典銓
衡門庭如水公退終日默坐看書曰恐失祖先謹揭
之風然持論侃侃於陰陽消息之幾善利公私之分
辨晰嚴正必極言竭論雖觸衆怒不少撓也其在選
部當朝論擣貳秉心公平不動於浮議僚案異己者
亦歎服曰獨見今世士君子廉察西北極陞殘鎮小
堡僻村窮輿靡不遍歷在北病不堪扶曳前進館人

愍然勸留猶不肯暫休是固盡瘁之節而未疾亦崇
於此云博極羣經舉多成誦雖疾病委頓簿牒倥傯
未嘗釋卷遇會心處取彩筆加點丹鉛不離左右酷
好詞章爲文必典瞻迺健而不少自銜故世罕有知
者褻躬儉約布衣弊席蕭然若寒士赴燕不市一卷
書彼我贖金俱無所用封還如舊上价徐相國文重
歎曰閔公有畏知之清配貞敬夫人延日鄭氏 贈
左贊成尚徵女右議政忠貞公維城其祖也卒於辛
卯附公墓左男宗洙早夭承洙縣監出后伯氏應洙
右議政長房男百亨縣監女適都正李綬判書李鼎

輔縣監洪啓重府使李權中縣監宋益欽次房男大
司諫百行承旨百昌百亨繼子台燁判書百行繼子
濟烈正郎百昌子卽濟烈也繼子命燁判書台燁子
致昇進士致恒致明濟烈又無嗣繼子致殷監察命
燁男致殷致文叅判餘不盡錄公以圭璋之令質儲
柱石之重望文學經綸足以匡輔君德又安邦家駸
駸有蓋梅舟楫之契而始不免爲黨人所忌克遂巡
榮途專懷退藏之義終焉厄於年壽罔展抱負之蘊
詎不關於世教汚隆哉直弼生也後縱未及踵門覲
德竊聞往昔緒論公與從氏忠文文忠文孝三公爲

善類領袖接武蜚英共獎王室德義風範竊致慕摶
乃者叅判君猥屬以玄隧之銘瘡病垂死筆與心朽
罔克形容其盛美謹撮梗槩而爲之銘銘曰

猗歟 熙朝素重世臣允矣閔宗代出偉人德厚流
光垂裕後昆公又挺生文質彬彬移孝而忠迪知忱
恂辭賁黼黻才抱經綸啓沃金華謬謬昌言賦政藩
臬有脚陽春清畏人知先美是遵夷險一節 聖倚
其純彼鼓簧者曾詬目瞋我德不瑕彌見其真惟士
遭際備經亨屯原始要終名實自醇總銓秉衡克著
勞勳遲徊眷顧未忍停身貞德之符遵晦自珍致恭

存位謙光孚尹胡不憇遺有憾蒼旻苟究厥施活國
壽民令名無窮頌在衿紳肅肅驪岡堂芥嶙峋我述
銘詩庸告無垠

下谷任公墓誌銘

并序○丙午

西齋任公有肖子曰時九字成甫西河人自號下谷
居士西齋公 元陵丙午以掌令抗疏痛陳辛壬義
理爲羣壬所構誣謫順安丁未榕棘大靜公擊鼓訟
冤兇徒不爲覆啓戊申西齋公被逮時有直送監刑
官之讖公號泣疾馳三日到海上賃船急渡遇颶風
幾溺九月又顛 蹕 上益怒命竄鐵山及行作公

無渡河辭及四祝詩以敘哀已酉二月蒙 宥庚戌
七月西齋公終于桁楊公返櫬于牙山舊廬遂僂廢
終身始公在謫西齋公貽書許以知識已定仍勉以
自保千金維持門戶訣諸子書曰某性不苟合又上
世父書曰此兒稟賦既不低弱且早閱患難膽益廣
而志益壯咸稱父子間知己云至 正廟丙申復西
齋公爵 純廟特贈吏曹叅判幽冤畢伸而九原不
可作悲夫高祖諱暉生員 贈叅贊尤齋宋先生表
其阡會祖諱弘望知中樞府事宋先生許以鐵心石
腸漢湖金文敬公銘其墓祖諱濬號瘦竹考諱昌夏

妣長水黃氏正郎 贈判書處信之女瘦竹公有弟
諱河執義 景廟朝盡言不諱斥母以子貴之說生
諱徵夏是爲西齋配 贈貞夫人光山金氏判書鎮
龜女卽公本生祖及父母也公以 肅宗三十年甲
申九月三十日生壬午十二月二十五日卒壽五十
九癸未二月葬于縣南可藏谷午坐配咸安趙氏承
旨榮世女四德俱著六親咸頌生先公二年歿後公
六年附公墓舉六男一女男孝白悌白忠白蔭同樞
信白珩白後白忠白珩白皆出系女適進士李義敬
泰增泰興泰昇長房出泰興出后次房泰東泰松三

房出泰春泰文泰民泰隣泰淳水使四房出泰岳泰
魯縣令五房出泰龜泰龍泰鳳季房出外孫李文在
曾玄以下不錄公有醇德敦行恢量博識且儀容豐
碩風采映發人莫不聳觀夙負公輔望少時訪李忠
定公弘述李公屏左右尊禮殊絕人問其故李公曰
異日吾輩子孫將被斯人陶鑄羣小覲公者咸謂若
使某當路吾輩必無噍類其爲人敬忌如此爲文章
富贍清警被藝苑諸公所獎詡梅軒趙文簡公觀彬
托以賞音并世矜紳辨 聖誣討亂賊者其文多出
公手時年纔弱冠云有遺稿藏于家公之先以名義

風節世家而公又傑特克趾先美若可以羽儀王庭
黼黻皇猷無愧韓范之繼業而早嬰世禍畢生坎壈
俾包天括地之志不少槩見斯爲志士之所齎恨者
也然無是父無是子無是子無是父父志子孝所以
答君親之恩盡父子之分者公之父子實有焉詎可
以窮通論哉孤忠純孝將垂百世而不朽是可驗皓
天必復也公玄孫憲晦謁公三世之文不佞強顏而
副之又請誌公幽堂不敢以菘菘辭遂援筆而爲銘
銘曰

忠義之門爲子未易繁公挺生拔出倫類庶幾生死

盡力盡息歷血叩 躡顛寃莫遂百死不悔用明父
志玄天幽遠鬼神茫昧廬墓攀柏蓼莪爲廢身否道
亨是爲大人乾道孔昭無往不伸成公兩世孝子忠
臣予以揭美有屹靈仁我撮其大用質明神

井邑縣監沈公墓誌銘 并序○丁未

霽軒沈先生文學德業模楷士林有二子文永獻永
長胤繼述志事爲世名儒季胤亦克趾美瞿軒沈公
師東嘗稱吾宗有少學者以季胤云爾也公字仲賢
初字季徵青松氏胄于高麗衛尉丞諱洪孚入 本
朝有諱德符左議政青松伯自是名德奕世至諱璿

京畿觀察使 光陵初服棄官自靖并傳至左叅贊
諱光彥師靜庵趙文正公著節于乙巳士禍寔公九
代祖也曾祖諱廷璧祖諱師曾兩世咸有潛德霽軒
公諱定鎮官司禦配坡平尹氏同中樞得壽女生文
永出系從叔父載鎮取族弟通德郎諱寅鎮子獻永
爲嗣通德公卽縣監諱重周之子而承旨諱之漢叅
奉諱梲爲其高曾兩世也承旨公當昏朝年十六疏
請斬尹訥等後登第歷敷清顯叅奉公號德庵以邃
學舉遺逸拜官不就縣監公師事寒泉經術德望見
推士友通德公配南陽洪氏縣監彥復女是爲公本

生母也癸酉中司馬己卯筮仕爲 莊陵叅奉辛巳
遞壬午差 徽慶園監造官癸未敘敦匠勞陞六品
甲申拜司饗院主簿轉義禁府都事刑曹佐郎正郎
景慕宮令 徽慶園令庚寅出監井邑縣辛卯因不
伏水土病猝斃方謀賦歸際值殿考喜曰吾計諧矣
昇還稷下舊第乙未正月十六日考終于壽春鄉廬
距其生丙申二月十九日爲六十是年四月六日葬
于壽春古隱洞子坐配光山金氏斗膺女淑愼慈良
閩範咸備生先公一年歿先公十八年墓于高陽歸
溪里癸坐舉二男三女樂容樂興女適洪一純徐相

董李謙沼繼配羅州丁氏義翊女有二男樂清樂元
樂容無男子樂清子魯集二女適趙懿鍾徐冀輔樂
興男魯在一女幼樂清子魯集出系女幼公生稟異
質纔免懷己知事親未忍離側及過房彌篤孝敬被
吳醇庵趙荷棲諸公獎誦受學于伯氏居觀齋公及
從姪壺隱公不待程督能自策勵丙午丁外艱時未
成童而執禮如成人得官以祿不逮養爲至恨事伯
氏如父常慟伯氏蚤世志業未卒往往流涕性和厚
慈良與人無親踈貴賤披露肝膈見婢僕欺蔽必理
曉義喻俾底悛改推及昆蟲草木必欲遂其生常誨

子孫以啓蟄不殺方長不折其敦同胞之仁可知也
居恒呐呐似不能言而剖析義利如一刀兩段日用
事爲樂易真率而見人矜傲諂諛若將免己家無世
業居無室廬竈不烟者三日冬無所覆用試卷掩體
而臥人不堪其苦而常怡如也在官以小學心經等
書自隨公餘不住誦繹絕不爲造請罕與人相涉井
邑民習機詐健訟公裁之以法濟之以仁裨躬儉約
不以家累自隨蠲除例納僧紙買市以需用爲隣邑
所取法獎勸髦士文風丕振捐廩周窳政聲載路歲
計有餘庶幾久道化成而鑿枘不合未觀厥成惜哉

公老而好學未嘗以處窮而廢業嘗從老洲吳文元
公大隱李公鳳秀講磨道義往哲稱人之善必本其
父兄師友者豈不信哉詩文敦厚宏肆不規規於繩
尺而旨趣自高然亦不屑也有莊齋散稿藏于家不
佞隨公于越中歷選羣勝至于規樓拜鵲亭相與攬
涕往往嗚咽失聲其氣意相感者如此非直以庚
姻好兩忘所趨也不佞聞人甚多而其能抱朴含真
用全天器如公者鮮矣傷今之世儒行墮地皎厲便
儼以自標置思得如公者以風之而不可作感念存
歿銘其可辭銘曰

人生至樂有賢父兄繫公造就得諸家庭孝悌爲本
衆美乃成我佩陸離我服芳馨克傳詩禮以承德聲
吁嗟嘿嘿誰知廉貞我懷伊人獨葆性靈恨不起公
爲世儀刑古隱之岡有恤其塋故人述行納諸玄扃
庸告來世永徵斯銘

學生劉公墓誌銘

并序○丙午

禮事師左右就養服勤至死與君親同故曰民生於
三事之如一惟其所往則致死焉宦人之役顏子曰
子在回何敢死朱子釋之曰夫子不幸而遇難回必
捐生而赴之是爲報生以死也師友道喪久矣知斯

義者其惟北青劉公汝豪乎始劉公從學文正公陶庵李先生于德陽山中三載值戊申亂作門弟子皆蒼黃奔逸先生勸公歸覲公不肯曰北路則寇難不及吾父母可保無虞吾則祇知有所在致死之義假使先生執鞫從王吾當與同死生及先生奔問入城公杖劍從之須臾不離側讀孟子不少輟人皆聳觀亂定隨先生歸德陽既數月先生遭罹橫逆將入窮山謝遣生徒公泣辭曰非欲後也不敢也先生爲文而送之曰生孤身客千里外一日遇變亂毅然撥一死守不去余矍索焉惟禍是遠不能相携以去子不

負余而余負子矣子歸而事父母一以小學爲師而後是真不負余又贈詩云出谷鶯知止乘春鴈識歸鋤時帶小學造次莫相違公服膺師訓夙夜劬書辛亥正月二十一日歿去其生乙酉七月十三日爲二十七歲葬于本治圭會社鍾鼓臺子坐公字道悅系出江陵祖諱先立考諱興元齊金海金氏墓附左子曰有三孫曰宅奎曾孫曰奉彩日彩謁銘者玄孫允晦也余少讀先生文夙知公爲北學之良而厄於短造罔克其志業惜哉嗚呼人有三大倫而得師之教方知忠君孝親而可盡其報生之道師之有功於君

親如此公能自力於鼓篋孫業至患難危急之際矢
死靡他為師生者於是焉定有補於世教民彝詎但
公一身之榮哉斯為公平生大節餘皆可略也銘曰
允文文正為世儒宗陶冶士心廣大寬容規矧既正
方圓應形自有曩括習其性成惜公無年未叩大鳴
所在致死願扶天經弘闡倫義無愧師生

梅山先生文集卷之三十九

梅山先生文集卷之四十

墓誌銘

禮曹叅判

贈吏曹判書李公墓誌銘

并序
丙午

正宗大王毓德春宮三十年博選宮僚用資啓沃聞
望盡一世之勝南谷李公諱鎮衡其尤者而公善處
功名之際一德終始死生哀榮於乎休哉公字平仲
系出 英陵別子密城君諱璵 贈司僕寺正諱尚
胤南原府使 贈吏曹叅議諱廷亮 贈吏曹叅判
諱墉是為公曾祖祖禰三世之 贈用公貴也叅判
公聘東萊鄭氏郡守亨晉之女以 景宗三年癸卯

三月七日舉公于叅議公慶山任所癸酉中生員試
唱名甫浹辰擢庭試丙科與伯氏叅判公聯榜循堂
國學四方之士環集曰今世文章也爭覩爲快甲戌
隸槐院丁丑薦爲承政院注書咸稱記注才戊寅用
藥院直宿勞陞六品內而兵曹佐郎正郎薇院正言
獻納司諫栢府持平掌令執義玉署校理副應教春
坊司書弼善輔德宗簿奉常寺正通禮院通禮外而
濟原察訪泰川縣監慶尚都事卽堂下踐歷而處春
坊最久庚辰以宮僚陪從 顯隆園溫泉幸行辛巳
以言官入對 東宮多所陳戒莅濟原四朔驛路用

蘇爲政泰川廉明有威不施鞭扑而吏民咸服上任
纔十月有遺愛碑掌試嶠南髦士舉頌其公平侍講
法筵請益恢察言來諫之德激勵頽風因文進戒
英廟嘉納處宮官四年受知于 健陵朝夕講磨左
右輔導時值艱危戒在樞機口不出 萬筵酬酢及
英廟賓天以告訃奏請書狀官赴燕 上教曰李某
卽余春宮時僚官講學之際多所顧問今當萬里之
行老病可憫 命給參料及別盤纏公律已清慎行
橐蕭然一行悚戢未復 命除東壁以封冊竣事加
通政階 賜奴婢田結拜承政院同副承旨屢轉至

右承旨間經兵曹參議參知戶曹參議戊戌奉安
英廟影幘于 永禧殿敘禮房勞陞嘉善拜左承旨
工曹參判兼同知義禁府事 上憐公年老無子
特命取公從父兄子兢淵爲子仍 教曰卿卽國家
同休戚之人而今乃有後予心欣悅對曰有父子而
後有君臣卽人倫之序而臣之父子乃是有君臣而
後有父子也復拜左承旨已亥居畱沁都 引見賜
饌寵以雲漢曰南谷山人亦世情沁州出按耀旗旌
佳兒繞膝身紗喜老婦開顏紫誥榮莫道功名由我
力從知天日照君誠菴蒼少別猶關念歸趁桃花滿

洛城公感激 恩遇壹心營職捐廩而堅築城之役
增價而矯買魚之弊其間未百日也時朝議以沁都
兼統禦營用正二品爲留守 上惜其遞移拜開城
留守是土也貨利輻湊居官者類多政以賄成公持
躬清嚴濟以節約承弊易變習俗幾革 上聞公病
篤 命道臣問加減仍 下御札賜藥劑又 命公
胤子乘駟往省尋除承旨 召還歷漢城府右尹大
司憲戶曹參判兼都摠府副摠管提舉典設司繕工
監庚子再除都承旨以禮曹參判兼同知 經筵實
錄事差壽司堂上拜京畿觀察使處劇如閒不煩聲

氣而衆事自理請給田災民無枉徵審讞罪囚獄無
冤辜未周歲一路晏如辛丑以病辭拜大司憲又以
病遞上數降珍劑臨朝愍惻屢形辭教是歲九月
一日下世享年五十九病革神精不變詔胤子曰
君恩如河海而涓埃莫報是可恨也仍呼寫一絕曰
忽逐秋蟬脫毅忙瑤天銀海正蒼茫靈飈且莫催征
棧未答君恩一恨長遂不復言惟聞闕中消息
至再三時產室設廳已過期矣訃聞教曰此人卽
舊時宮僚也病雖沈綿不料遽聞長逝之報驚怛何
言卽令該曹元致賻外倍數加給在邸時宮僚卒逝

則例給歸厚署棺板此人此例豈可靳惜命照例
題給帛祭依例而致祭命待下教又教曰予之
文字間得力多賴此宮僚至今受用資益不些况在
甲乙之際倘非此宮僚之慎口審幾則違雲溫室樹
之說必發於聽政之前明義之書名雖不載功實難
忘噫嘻今焉已矣九原難作惜未及置之正卿今日
特贈判書贈吏曹判書兼銜如例越三月戊申葬
于楊州北斗川乾坐小祥前一日上親製文賜
祭曰卿在人間寄如過客斂歸太空蟬脫其殼獨有
忠愛生死固結臨化一詩赤腔流出予從貳邱得卿

爲友時維艱危昕夕左右卷懷如愚涇不渭濁次月
三節豈曰酬績切後馳贈始副常期疎襟爽語起予
者誰宮筵扶醉俛仰成塵十行一酌表予君臣癸卯
春 教曰乙丙事尚何言哉兕徒亂擊結締腸肚左
右傍伺日夕交煽凡所以恐動予危逼予者殆無紀
極予之不得解衣而寢者積有日月至今追思心驚
夢愕時則有若 贈判書李某爲予宮僚一心王室
殷憂焦慮至達面目慰予以忍性之義勉予以處難
之道藹然忠赤有足感歎雖以賊黨百端媒孽之謀
亦莫能窺其涯涘逮夫數年以來世變層生無所不

有而涇不渭濁薰不蕪化終始一節隨處彌堅雖謂
之昏夜明星未見其過實肆予曰篤不忘傾嚮采深
擬將晉秩八座警勵頽俗而未之果焉歿後馳贈始
用所常期者每一念至不勝慘惜向來致辭已示予
意而當此民瘼漸晦人志靡定之日如贈判書者何
處得來噫國無節惠之典則已不然不加於此等之
人而加於何人 贈判書李某令弘文館議謚此傳
教優是自家一編行蹟亦不必待狀而爲之一體知
悉謚曰忠簡是可以見公君臣之際也公生稟異質
眼光射人叅議公鍾愛殊絕曰必大吾家與羣兒戲

必自爲將約束有法六歲遭內艱撫養失宜遂致貞
疾九歲始就學而朗慧成性讀未半卷而綽有長進
時陶庵李先生訪叅議公已聞公有高才反辭而責
之曰九歲猶讀史畧乎使人大慚公發憤勉學至忘
寢食稍長文藝驟進淹貫經史旁通陰陽術數及孫
吳之書又解墨妙未嘗費紙而草楷俱成體格丁外
艱毀瘠幾滅性而亦不廢勵業本之經術而發之爲
詞章功令之文亦不專意而工然所樂不在是也居
恒伊吾鑽研窮晝夜不休長於記誦誦所讀諸書閱
數旬而猶未盡其聰悟絕倫如此器量恢達喜愠不

形而見人不是若將晚已恬靖簡默而或值酒醪酹
激昂慷慨談論千古如決江河而注之海釋褐數十
年不苟合當世欽崎落拓而不少介懷簞瓢屢空而
不問家人產業安時處順樂而忘憂逮夫遇巷 恩
眷隆攀位躋卿月晉塗大闢而褫躬寒素無異處窮
嘗舉奢儉之難易以戒胤子居常務自韜晦不少槩
見 上每歎曰卿可謂有若無實若虛常待之以僚
友輒呼南谷以家南山下也仍以爲號焉嚴於辭受
却西倅之帛斥象譯之貨沁都時 教書有銜命燕
京冰檠著操之語公不悅曰吾於燕行貨一驢冰檠

之云能不愧乎卜居岳麓或嫌其濶公曰昔人置田宅必於窮僻豈無意乎配貞夫人密陽朴氏左尹弼正女闈範咸備生後公四歲歿後公八歲及喪特命內帑從厚賻助異數也附公墓左兢淵文科承旨有二男三女男根魁生員 正廟念先故錄後官郡守繼后本宗株以次嫡尸公祀亦 命調用以未及除職而歿 贈教官女適鄭樂綏金魯俊趙在昉教官男熙清今直長女徐有會郡守系子熙殷今縣監女洪在承熙清三女俞鎮鼎朴取夏俞鎮球郡守二男憲堯章堯二女幼公體貌脆弱而性度尊嚴若以

綿裹鐵然故當 英廟季世邦朋樹黨世道交喪危逼之形至及 貳極而審幾密贊竭力調護不露鋒穎默而成之竟措於安是所云王臣審審匪躬之故者乎且不失身于同僚之權兇塊然無徒廓然獨立不獲世之滋垢明良際會曠世一值而居寵若驚謙恭寅畏其垂令名於無窮也宜哉公雅言病羸不任退耕遂不免欺有司倖科第自茲以往皆分外也記通籍后行止名之曰外物錄知其爲外物誰能使驕泰隕穫於得失哉士大夫只知軒冕之榮而不知休退之樂者何異於醉生夢死哉將乞身而退以娛晚

景於江湖之上是公之所矢願而未就者然其高情
遠韻亦可以想象也不佞與公有屢世之好夙誦公
風節公曾孫熙清以其祖承旨公之狀來謂不佞曰
今世之知吾祖最深者惟子在子又及耄矣不及今
爲之銘將何以闡揚德美於後世乎不佞辭非其人
而不獲遂力疾而爲之銘銘曰

侃侃李公出自天潢遭逢 正廟効厥忠良 正廟
曰咨嘉乃舍章朝夕承華啓迪孔彰屬時乙丙世道
玄黃辨幾察影夾介 少陽內言不出用自斂藏轉
危爲安誠格穹蒼君子慎密乃終永貞夷險一節受

知 聖明遵養時晦砥行立名何以致此玩心研經
經正民興何用不臧所以明哲旁燭煌煌天衢雲路
進步將將一曙厭世脫屣其忙胡不少假用卒贊襄
恩綸荐降收存恤亡 宸情追舊彌久不忘歷選在
廷鮮與儔匹烟霞初心江湖晚節千駟萬鍾視以外
物是公平生中自蘊結感戴 殊遇未忍僂訣瑤天
銀海遺恨不滅有屹斗岡有幽其室炯炯泉濺濺
腔血我詞不諛百世是質

擬甯尹公墓誌銘 并序○丙午

文簡公止庵金先生講道于黃驪之上故同知中樞

府事尹公首先師事而至誠服勤時及門之士甚盛而先生獨許公以篤實又云世道喧騰物情紛紜而默數知舊惟君最可信錫公號曰疑窩取中庸至德疑道之義也公終身服膺先生家禍孔棘公常懷愍惻以孫女妻先生曾孫支柱其門戶先生所以最信公者豈苟然哉古人云死者復起生者無媿公實有焉公諱聚東字汝五海平人始祖曰君正事高麗高宗官至尚書左僕射入本朝有諱斗壽海原府院君文靖公爲中興元勳生諱昉文翼公兩世俱爲元輔生諱履之判敦寧府事貞孝公寔公五世祖也工

曹佐郎

贈吏曹參議諱培

贈司僕寺正諱世長

進士

贈吏曹參議諱洙

贈吏曹參判諱得良卽

公高曾祖禰而三世之

贈用公推恩也參判公有

至行娶文化柳氏長鳳女女士也親授諸子學以

英宗三年丁未二月十八日舉公公生稟近道冲齡因摘果傷夏不遊戲行險嘗患浮脹陷危醫皆斂手柳夫人夢一老人授以金圈曰給病兒兒病當瘳勿憂也自翌日乃瘳及授業沉潛悅繹不待程督長益刻厲早謝功令專精性理之學卜居溫川歡城之間潛靖自修劬經研禮夜以繼晝殆忘寢食自是華聞

日彰道伯洪公秉瓚以望重斯文薦于 朝癸卯拜
貞陵叅奉或勸以不起公出膺日出處惟義之視我
何以名爲哉歷 景慕宮奉事軍資監司饗院直長
司僕寺主簿司憲府監察丁未除龍仁縣令恤窮蠲
役課士勸講莅任纔三月而施措已多可觀時道伯
挾私憾置殿考公歸隱故山簞瓢屢空而味道自腴
於世間寵辱欣戚一不嬰其心己未蒙推老 恩陞
通政階除僉知中樞丙寅以八耄陞嘉善大夫同知
中樞戊辰七月二日卒享年八十二九月葬于長湍
梧陰里丁坐從先兆也配星州玄氏若淳之女生先

公一年殉先公十九年墓于連山德目里戊坐柔淑
慈順事無攸遂亦不以有無而累君子有一女取公
仲氏諱台東子英烈爲嗣女適李運源英烈子致麟
今槐山郡守女金仁根逸掌令卽止菴先生曾孫也
李運源四男浩秀熹秀厚秀美秀二女朴齊日鄭海
壽致麟三男冀善翼善戴善金炳愚閔泳緯掌令子
女也公孝悌天植奉雙親致養志之誠居瘠或離喪
次則卽所寓設虛位晨夕哭臨用伸哀慕自公義起
而克校情禮者也父事諸兄及析箸未忍遠違常常
源源怡愉湛樂嘗渾室邁癯荐罹鴿原之憾喪威震

剝而經紀終事情文無憾教養孤姪與從曾孫俾底
成立居恒夙興整衣巾對案危坐窮日夜課書家人
不敢嘻嘻閨庭靜肅如治朝重友道與人必推誠信
坦然無畦畛口不出俚諺體不設散容見善若已有
而有過則面斥人或不愧而亦不恤也充養既久踐
履克篤驗之於動靜語默推之於日用常行而綽有
餘裕自無逕庭嘗云才曾用人一已百之功讀書必
字究句索務精而不務博必要自得而不泥於古性
命之蘊奧箋註之紛羅與夫吾東諸賢所論著者罔
不鑽研會極其歸趨因之劄述疑義往復講辨碎毫

析微不明不措而不自株守舍己從人於羣經靡不
用力而最好庸學常夜輪誦其論未發曰靜與未發
似有分別以大體言通謂之靜而細分則未發是靜
之中寂然不動炯然不昧之謂也以天命而爲人則
源頭未發聖凡不異自其戒懼工夫有淺深而始乃
懸殊衆人不能保天命之存而無未發之中論明德
曰虛靈不昧四字已足明德之意而若不并說體用
則意不詳備故必兼言具衆理應萬事後儒欲牽合
於張子心統性情之語而張子此語不指明德也栗
谷心性圖去情字合心性爲言者明白可據是皆默

契心融折衷於羣言者也雅好經濟曰井田猝難舉
惟限民名田可以通行於古今者也公遍交并世名
賢屏溪溪湖止菴大齋竹巖則尊事而依歸於止菴
性潭萍湖近齋東圃則友之而資益於近齋者爲多
指引後進必勉其立志而先要務實曰誠實無偽吾
於兪大齋見之不惟舉似學者亦以自勗爲畢生進
德之符焉學者卽公所居而稱之曰汾溪先生爲文
章不事藻繪而務盡條暢尤長於書牘諸經咸有疾
書而多散佚庸學集說喪祭禮彙考并詩文藏于家
嗚呼公性嚴而志確氣定而言厲少時卞急到老更

冲和慈諒色笑藹然可知爲有道君子也早受師友
之益門路醇正晚積存養之功造就高明精爽不衰
進修彌邵殆不知年數之不足是無愧篤信好學守
死善道者也降志綠仕用自晦身身世兩忘靡所怨
尤世或以公之不列於彙征展其所蘊爲公嗟惜然
古人云知我者希我貴公不求知於人而人爲公成
貴斯其所以爲公歟昔我祖考牧使公恬靜寡交遊
獨於公以德義相孚非直以庚誼僚契也直弼早登
公門觀感而請益公以其爲故人釋孫也存撫殊絕
所施教者洋洋盈耳雖不克傳習亦何忍弭忘公嗣

孫郡守君狀公德行而授直弼曰我祖墓向闕幽誌
而世無知德者苟欲託知者而托之舍子其誰直弼
逡巡不敢當而甲懇不休其何可終辭以重負幽明
哉銘曰

棟棟尹公允矣弘儒形神清瑩山澤之癯氣宇竦峭
松筠之貞蚤自停身聖門是程就正有道竭志明誠
隨緣祿隱跡屈道亨亟遂初服服禮研經陶陶真樂
養我性靈廣嶽崑嶷汾水清冷遵晦凝道不顯其名
高朗令終有融昭明壽躋九耄位班貳卿有美孫曾
克紹典型惟天報施啓佑無疆三達不朽百世流光

矢辭于銘虔薦玄堂有斐君子終不可忘

衍齋李公墓誌銘

并序○丙午

不佞冲年服事近齋朴先生先生遵晦養德不喜授
徒不佞嘗問及門之士可與共學者先生曰吾內從
妹胤子李君升淵誦羣經如己言守厥躬若處子所
期望綦重者也固已心許日被公款扉相視莫逆彌
信先生所以獎詡者非苟然也及哭公述誄以敘哀
公兩胤又請幽宮之誌兩胤服習公身教恬約自持
其言尤可信遂接狀而敘之曰公字文階初諱雷淵
嘗被應製入侍 正廟微示改名之意卽今諱也系

出璿源以 世宗別子廣平大君諱璵爲始祖宗盡
而珪組奕世至林川郡守諱湛敦寧都正 贈吏議
諱顯允永平縣令 贈吏叅諱立中軍威縣監諱義
和卽公四世也縣監公娶杞溪俞氏通德郎彥孫女
章憲公命弘之曾孫農巖金文簡公昌協其外曾祖
也公生稟聰慧纔五歲父母試問雨脚幾何公下庭
數簷溜而對及長受業于良齋洪公儀泳就正于近
齋爲士友所推重壬子中司馬甲子除 翼陵叅奉
以內艱告前不就庚午拜 齊陵叅奉陞義禁府都
事 宗廟署直長轉尚衣院別提掌樂院主簿復拜

禁都移戶曹佐郎 永禧殿南部 長寧殿令典牲
署判官丁丑出監木川縣邑貧吏竄倉無棲粒公施
措有方不勞蒲鞭而廩完積逋稅先致期修舊起廢
百度俱貞遇旱禱雨輒有冥應隣境民咸服其誠奏
其官請法木川設禱蒞任四載政清訟簡令行禁止
繩姦懲頑俾自屏息官廨改觀村徭多革道伯至褒
以公而無私隣邑有疑獄久淹道伯屬公辨理得實
而償冤咸稱神明縣中多族戚上任後一與讌飲歲
時名節輒施饋約毋得出入偃室外氏先塋在界內
卽其晬日設殷祭展省歲以爲常外高祖章憲公墓

所有所乘肩輿公爲改修輸致官牙翌日懸輿處忽
頽亦可異焉居內外官未嘗毫髮枉法戒家人曰官
事在人不合則去竟以剛直不撓見忤監司公雍容
辭遞吏民惜去久而益息癸未因敦匠錄勸丙戌拜
掌樂司饗兩院主簿丁亥拜軍資監判官是年卽公
之周中甲日操文告哀于親墓家人不敢道是日以
常倍悲痛也俞夫人哭殤而憾公不離側諦視顏色
夜必捫面而驗淚性於孝者自齟齬已然每讀好文
辭輒諺釋而聞之及持制每遇嬰疾日哀傷無間諱
辰暮而撤靈葦朝夕饋奠之米用備朔望之需遂詔

後無廢人服象生不匱之慕縣監公患風痺八年家
無餘貲而極甘旨之供居前後喪易戚咸備以雙親
甲晬值 國哀官皆罔克稱觥爲沒身恨逮仲父同
樞公回甲製衣設饌會親屬讌于家中不俾知營辦
之艱卽孝之推也友二妹篤摯每誦先範相戒曰父
母歿靡所因極願吾三人苟存視息當次第乘化先
固無知後者何忍恤長妹無育雖微物必分多潤寡
季妹殉夫教養孤甥如己出以不及見綽楔爲至痛
公伯氏內外俱早歿無后縣監公詢及宗中以公爲
嗣而公於主祿讀祝不讀孝字雖過於禮而亦可見

其重宗也公卒于 純廟己丑四月二十六日去其
生丁亥爲六十三歲始葬于果川盤浦里戊戌十一
月四日遷厝于龍仁器日面遲日里卯坐配潘南朴
氏生員師永女舉二男一女男寅行寅寧女適洪稷
周俊夏長房出禮夏及金夔秀妻及未行者次房出
公天資近道濟以好學爲政于家而恩義克篤成教
于官而威愛允濟且潛靖自修不求合當世世豈有
知公者是乃公之所以爲公者也居恒好讀禮晚契
羲易得需卦之衍字扁齋仍自號求記于不佞曰吾
以行文處世又取魯論無益不如學是吾憂一旬揭

座右自警而誨子文章本之經術多可傳而以先世
文獻之盡逸不自收載古所云砥行立名之士知廉
恥修禮讓不利於苟得不牽於苟隨而惟義之所處
以故其人至難得至可重公非其人哉是可以銘銘
曰

曰若人之好修兮慕往哲之遺教誦六籍而自怡悅
兮顧言行其慥慥繫仕學之相優兮志不存乎溫飽
布陽春於百里兮回號咷而爲笑哀時命之不遘兮
棲鸞鳳於枳棘獨焯介而不隨俗兮夫安肯改錯其
繩墨惟榘枘其蔽雲兮曾不售乎匠石矧自脛而玉

自璞兮孰信修而成名不獲世之滋垢兮吾獨述其
廉貞

松島羅公墓誌銘

并序○丙午

在昔 長陵之世國家荐經大難羅公海崙再倡義
旅沫血誓天奮不顧身以趨君父之急雖因亂定而
罷和成而退功烈不克遂於當世而痛天壤之易處
甘沒世而自靖凜凜有蹈海之風其所秉執可暴於
天下後世詎不偉哉公字應淑號松島系出羅州以
麗朝監門衛上將軍諱富爲鼻祖 本朝有諱璉除
戶曹判書抗義不仕高祖曰逸孫已卯名賢曾祖曰

昶翰林祖士惜主簿考德謙 贈叅議叅議公與忠
烈公德憲寔爲從父兄弟妣豐山洪氏叅奉漢信女
公狀貌奇偉文藝夙就受業于睡隱姜公沆深見器
許十五遭丁酉倭寇公將兩親隱德龍山中叅議公
患瘡思牛肝公夜行歸舊第牽犢而來遇賊被執公
責曰吾爲親病冒險至此誰無父母母我害也賊感
歎曰真孝子也扶而送之亂已而還臧獲盡散公躬
樵採負米以供甘蠶不弛勞旣長自奮與從弟南礪
公海鳳講習不怠用繩先業及壯猶未有室或勸之
醮則曰孝衰於妻子吾不願娶金公璇慕其義以其

弟叅奉璵之女妻之至戊申高公敬履辨牛溪松江之誣被禁錮公與朴公濬哲治章鳴冤扶正斥邪之義炳如也時值昏朝彝倫斃絕意進取而爲親故猶隨衆公車嘗一發解過省爲時輩所忌見削學籍公不少介懷丙辰叅議公疾革公夜不解帶竭誠刀圭祈以身代遭憂哀毀踰制三年廬墓淚濕草枯拜哭處冬雪先消服闋大夫人年已九十左右護養或以事出雖祁寒暑雨復不違時繞膝怡愉常作嬰兒戲甲子中進士以親意設宴負母夫人斑衣而舞觀者感悅尋聞适賊叛與邑中章甫慷慨發檄聚軍糧

舉義誓衆事載甲子慕義錄庚午丁內艱執禮如前喪制除泣言今而後吾誰爲養所祈祝者吾 王無疾斯又移孝爲忠之一端也丙子清人入寇 大駕播遷公又謀興義師牧使吳公竣以公爲義兵將從民望也公以子儼爲軍官設廳于客館日夜治軍傳檄一道烈士雲集丁丑正月行到公州義兵都元帥崎翁鄭公留陣以待公與論戎事鄭公爲言使義將皆如君賊不足平也未幾構成公北向慟哭曰不如無生秋有人書宮門曰三綱已絕國隨亡公議千秋愧汗青公見而撫腕曰惜乎此人不能豫陳謀猷致

今日之事蓋其意以當時謀國者之不能備陰雨爲
深恨自是絕口不言時事庚辰拜 孝陵叅奉引義
不就惟教誨子孫不少饒假故諸房并有造次第升
庠常戒以爲善曰爲我子孫者體此永念無得罪於
皇天鬼神 仁廟上賓公朝夕哭臨衣麁布麻帶處
之如親喪焉及卜 珠邱率二子赴哭 廡衛公時
久患瘡家人諫行不聽曰父子千里赴哭臣道盡矣
我心安矣常以親在時貧不具輕煖沒齒痛恨到老
家溫猶不衣帛遺戒斂勿用繒紬日必早起整冠襟
欽欽如也遇鄉人以誠勉後生以學問孝悌雅言人

道以孝爲先穆君爲忠忠孝可須臾離哉并時論篤
行者輒以公爲首焉己亥十月二十二日卒去其生
萬曆癸未七月十四日爲七十七歲葬于州西之長
興洞子坐與金夫人同城異墳從先兆也公有四男
傳徽儻并進士儻側出男保僮儻子天老天鼎天衡
并進士天心生員儻子天樞生員天樞子以桂生員
曾孫以下俱不載噫公以下土布衣一朝倉卒徒以
氣義相感激惟知有君父而不知有其身赴白刃如
平地是所謂先立其大者歟公有深愛於父母知幾
遠害兵燹搶攘而潛隨不闕至使狡酋感服且六年

居廬毀瘠幾滅性仲尼云孝者所以事君知孝者俟忠而成之答君親之恩明君臣之義公庶幾無愧也錦城有西羅東羅之目西羅卽公之後孫也戊申之變東羅或從逆而西羅洞辨逆順之分不有公忠孝風烈垂裕後昆亦何能乃爾哉公七世孫錫冕抱公遺事踵門而謁又余老屏鉛槧而竊悲公名之湮沒無稱力疾而爲之銘銘曰

抑抑羅宗篤生忠烈公又繩武是叔是姪爲國倡義再揚風節功未及遂乾坤毀裂無地可灑滿腔熱血將身逃隱遵晦蓬華本之則存百行是源教誨式似

詩禮昌門門闌告榮三子七孫天道報施載承德聲課忠責孝于後遺羸有紀南國疇與爭名律律與岳若芥其瑩琢辭載實用納玄扃勗哉髦士繫公是程

中洲李先生墓誌銘

并序○丁未

中洲李先生捐函丈三十六年嗣孫胤秀謁玄堂之銘于直弼直弼亦嘗奉教于先生者詎不敢辭遂爲之敘曰先生諱直輔字維宗初諱城輔貫延安以唐中郎將茂爲初祖至左議政文忠公諱廷龜吏曹判書文靖公諱明漢禮曹判書文肅公諱一相仍三世典文衡不須譜也文肅公生諱海朝觀察使負雋望

局於短造未充志業生諱度臣 贈判書卽先生祖
禰也妣安東金氏處士彥謙女文忠公壽恆其曾祖
也舉先生于仲父江西任所端重聰慧識者已知爲
大受之器六歲而孤哭擗如成童未嘗戲嬉八歲賦
詩云明月出滄海清光萬里來再從兄晉菴公期許
甚重曰非吾所及也稍長勵志爲學竊日夜不輟爲
文章下筆滔滔華聞日章并時名願願與結交時羣
從兄咸處崇顯勸先生進取每赴試試院輒物色求
之先生遂不應舉及遭內艱毀瘠幾滅性而猶疏食
終喪時漢湖止菴兩先生爲世儒宗先生從之學兩

先生許以吾道有托壬辰喪漢湖從止菴于驪江專
心服事晨夕不離雖羈旅窮窶備經佗條而處之晏
如也甲辰除繕工監監役不耗乙巳拜翊衛司副率
暫就而遞辛亥拜童蒙教官壬子薦拜 經筵官上
疏辭 批諭隆摯歷數官拜咸鏡都事司憲府持平
掌令乙卯除高城郡守又下 別諭先生援往哲辭
內居外之義遂肅 命引對諭以今筵乃是邀鑿問
病病有虛實寒熱之異藥有君臣佐使之別欲聞藥
石之言先生以守令不敢當儒臣之禮固辭 上教
益切先生略陳持敬之說且曰堯舜心法元不外是

實能行之則堯舜不難也主聖則臣直不患無人
上爲之稱歎命宣饌先生留章而歸 賜優批命郵
官傳諭挽止之旋拜掌令丙辰上章辭執義 批曰
昨夏一接稍慰疑竇忽地徑歸常切悵失林下去就
不欲自輕而世臣之義亦不若是翹然從速上來繼
陳向筵未畢之蘊仍擢同副承旨 諭曰置邇列非
爲侈銜况於尋鄉必欲更致朝端誠未見孚尚遲幡
然除禮曹吏曹叅議時有河西重峯慎齋三賢請配
文廡之論 命與林樊隱德之士講明之泮儒以書
質先生且引遜巖并享沙溪慎齋爲證先生對以盛

舉蓋遜巖以慎齋配沙溪與并侑稍異而泮儒率爾
援噏藉重先生至登章奏 上下嚴教將以河西單
享命往詢先生以前事自引不敢對時論囂然認先
生是并侑而非單享大臣至請罷職冬 命還付筵
銜降別諭旋除禮曹叅議累下悔悟之 教俾筵臣
傳報先生感激涕泣陳疏頌愆丁巳以 元子將就
學拜右諭善陞秩拜工曹叅判繼有都憲擬入之
命旋除都承旨遣史官宣召又 命偕來史官仍留
過歲 天書五降敦勉隆摯先生乞收還史官調病
登對 許解筵銜以安其心而頻問行期繼下 別

諭三月造朝。禮遇甚盛。畀以啓沃。聖躬之責。輔導。元良之任。勉留勤懇。輸送食物柴炭。遣掖隸朝夕勞問。賜饌。內殿亦如之。又賜章服。品圈有具。品服肅謝之。教先生力辭。不獲命。詣元子宮行禮。開講仍叅朝講。講中庸。奏曰。中庸要旨。專在慎獨。無聲無臭。所以形容不顯。篤恭之妙。以至天德之極。致結以上天之載。究其本則自慎。獨上出來。積累於毫忽。省察於幾微。一念無怠。始可合於天道矣。仍陳戒懼貫動靜。慎獨。就一念始發處而言。未發境界。實難形容。才欲着功。便歸已發。先儒所謂昭昭具在。惺

惺在這裏。常著照管者。形容得好。又曰。宋臣宋彭年云。人主天也。人主有一毫不與天相似。而其臣不諫。則不能以天事主。此乃不忠之大者。先正臣李珣曰。道統在上。則道行於一時。澤流於後世。此臣所望於殿下也。上嘉歎。因陳疏辭歸。仰勉聖德。且言名義未肅。而人志未靖。道學寢微。而邪說肆行。言路不開。耳目壅蔽。廉防日頽。奢侈日熾。輕儇浮澆之習。莫可收拾。累數千言。下優批。仍命承旨偕還。後再除都憲。庚申。拜侍講院贊善。將行。世子冊禮。特遣禮議偕來。恩旨懇迫。先生爲有不敢當之。教不得

己承 命與性潭宋公同時赴召 教曰師傅諭善
共光開講及今慶辰又見黃髮聯造貴我賓僚之儀
簪紳聳輝予心爲幸固萬萬矣况三輔九卿之秩可
合於宿德乎 命兩儒賢陞資拜先生右叅贊先生
上疏辭又有兩儒賢子孫初仕除授扶掖入侍之
命眷注崇篤錫賚復蕃瞻聆罔不竦動先生惶蹙感
泣禮行陳疏告歸畧曰堯湯有累歲之灾而民無捐
瘠者以畜積多而備豫久也顧今中外府庫枵然營
屯廣占而小民受困冗官多設而廩祿難繼若值歉
荒民將盡劉奢靡太盛亦爲耗財之道雖如內閣刊

書之役諸道貢獻之費亦皆停減另擇藩臣守令務
盡恤民之澤使恩澤下究焉 上皆嘉納又遣承旨
挽行人謂內閣壯營爲世所諱莫不爲先生危之先
生聞之夷然也 上嘗諭筵臣曰驪江儒賢容儀魁
梧言議峻整非今世儒者之所可比六月 正廟昇
遐先生驚慟隕絕進詣廣州受哀而還 純廟嗣位
除都憲吏曹判書大臣有 正廟嫌名請改之奏先
生陳疏改名又拜都憲吏判 息諭彌重先生進慰
入侍 東朝垂簾引見哽咽謙以 先王禮遇之意
今日國勢之危勉留勤學先生吞聲感泣曰宋臣蘇

軾承宣仁太后之諭以先帝遺意不覺失聲慟哭臣
之衷情抑塞實百倍於蘇軾仍陳保護之節輔導之
方 東朝涕泣者久之先生出郊迎哭 廠衛至陵
所待復土陳章而歸 遣承宣留止仍 命看護病
勢辛酉復拜都憲吏曹司圖署提調知敦寧壬戌特
除先生子教源龍仁縣令仍 命敦諭先生附奏陳
謝又拜成均祭酒疏請羨湖止菴櫟泉三賢贈謚
上允之又拜特進官乙丑 貞純王后禮陟進詣郊
外成服上疏陳慰 純廟患痘瘡先生承俟郊外待
上俟康復而還進章陳賀丁卯以年滿七十歲輸衣

資食物戊辰別諭 命薦讀書士以宋啓榦金直淳
對俱被儒選先生上疏陳謝辛未拜 元子右諭善
時先生以山水之勝就胤子茂朱任所因留焉是歲
九月八日考終于廡舍享年七十四訃聞 上震悼
輟視朝二日賜賻有加遣承旨致祭太學生設位舉
哀門人加經服素十一月十四日葬于忠州舟川里
卯坐後因儒臣言不待狀而謚用道德博聞夙夜儆
戒二法賜謚文敬先生天資近道九歲讀中庸而曰
吾何以身致中和見位育之盛乎仍蹈舞不已孤惻
疾病而猶能感發刻厲博通經史百家以及陰陽律

曆罔不究解爲學專用心於內嘗讀論語顏淵仲弓問仁二章不住誦繹以終三夏又以鄉黨篇爲修身真訣曰聖人之敬熏天灸地此吾所力行而未能者也最喜尚書曰親切身心或勝於四書讀羣經不拘諺解常自遵晦猶恐人知三達俱尊而不以師道自居不許人束脩而啓牖後進出於至誠嘉善而矜不能雅言聖狂之分只在一念學者知所利害則去就易辨引書惟天無親克敬惟親而曰敬乃聖門第一義不可頃刻間斷又曰日用間無一毫人慾在腔裏方有田地可下工夫否則如鏤脂畫冰無真實得力

處每舉孟子道性善周公我師等語誨諭諄切故一經指導人無不感悟進修節度壹遵紫陽成法論禮亦必依據而未嘗臆斷也以蚤孤有終身之憂服不純采食不兼味不聽聲樂每哭喪餘如袒括齋沐達曙至邵齡而誠禮不替常守身不出言不出之戒至不對獻議而忠愛根天登筵告歸輒有陳勉微言至論切中時病讐言喧騰而不以禍福動心焉賴正廟察公孤衷爲之優容恩禮曠絕存問錫賚幾無虛月德意周洽靡所不至先生每對王人俯伏涕泣曰賤臣無狀煩勞聖念罪戾彌重嘗遙望健

寢松栢嗚咽不自勝感動徇人及聞 純廟聖侯告
愆焦遑明發臨終諄諄如夢囁皆 上侯加減也嘗
以進賢爲報國之道而未及薦閔致福至欲草遺疏
疾革未果常夜誦離騷出師表文山詩慷慨激烈不
能自己與觀生窩閔公泛舟笠澤語到 寧陵志事
仍泣數行下素日以卑牧爲度接人惻款和樂不厭
言笑鄉黨莫不悅服敵己以上皆下堂迎送執禮甚
遜或疑其過中先生曰罪重欺誣故年位益高而心
益兢惕耳每服古人一字不入都下雖親戚故舊未
曾先施亦不肯酬應文字曰吾旣竊虛名又擅文權

必爲造化所不容以經禮問亦不答居恒不事著述
有散稿幾卷戢于巾衍先生挺生名門蚤得聞靜觀
芝村之風又得溪湖止菴兩先生以爲依歸專心傳
習察善利之幾而蚤自停身屏詞章之業而猶恐喪
志各理淵藪沉潛闡釋而亦不敢信己而信師潛靖
自修以養吾誠收功於一原洵古所云心學也孔門
教人罔非存心養性之事而但不明言至孟子而特
言其所以事天蓋心者人之神明性者人之生理必
須食息存養方能本心常明天理自全是乃終身事
而先生旣精於問學又專於內修馴致敦篤虛靜而

熟仁之本是爲永世章程者也夫持養久則氣和氣和則溫裕婉順望之者意消忿解體察久則理明理明則諷導詳款聽之者心喻慮移茲爲朱子涵養之真詮而先生有焉是豈騰理口耳者之所可擬議哉嘗痛懲虛偽之弊曰學問雖好惟質美者可爲質不美者不可爲適足以戕其身而害世道其旨微哉寧齋吳公贊公氣象曰風範端凝并世無比族子述源曰洵崇昔之逸民族孫鳳秀曰孝悌通於神明爵祿不入於曾次實心實行見面盎背三贊知德深故其言乃爾是可以觀先生也配貞夫人咸陽朴氏僉知

晉揆之女舉一男一女教源校理女縣監宋啓馨校理繼子胤秀蘭秀芸秀金東箕元錫愚妻側出也宋婿繼子大熙胤秀男冕愚女元在弘宋臣熙閔泳年餘并幼直弼夙承光範而志業荒墜罔副期望之重常懷愧怍今朝暮且死矣乃以蒙識朽管闡揚大君子道德自知其強顏而微此何以酬知遇之感哉遂爲之銘曰

李於東族莫之與京三世詞垣主盟提衡載其弗祿繼以道鳴克續厥緒曰惟先生先生之質純粹清貞幼志勇往聖人是程孝悌爲本本立道生寤寐求仁

仁道斯成進德居業用立其誠體認天理務養性情
端拱無言養我真樂只輸顏氏心齋是得潛藏淵龍
聲聞臯鶴致敬盡禮蒲輪玉帛迫而後出遠遂初服
昌言宏論君心是格天德王道要在慎獨王曰
俞哉乃言底績洞開不諱俾竭惻隱風雲際會曠絕
今昔賓師三朝考造一國囊封獻忠用述師德概
厥平生身名俱卓疇論良史闡厥心學舟川之山光
氣紛郁有血幽堂有鬱拱木琢辭載實用備陵谷勗
哉髦士百世是式

進士朴公墓誌銘

并序○丁未

漢師之南里有篤行君子曰朴公諱鼎源字聖受生
稟異質三歲不斷乳與弟同吮慮其不均請阿孃曰
願兄弟各吮其一母令阿季饑七歲與季患痘而斃
阿孃專意視公不遑護弟病公殿屎中猶言兒則無
傷盍往救弟於父母有深愛侍湯至廢寢食遭外艱
疏食三年毀瘠幾滅性卒哭而仍設朝夕奠既練而
行晨昏拜雖過於禮而寔遵先法也母夫人患痢嘗
糞甜苦夜禱北辰願以身代居憂如前喪明發念昔
著存不忘細述平日言行暨臨命遺訓名曰居家雜
儀既免喪仍不復寢每晨謁家廟朔望展墓至七耄

不廢哭喪餘如袒括涕泗滿席雖癘病猶不肉攀撫
松楸嗚咽不忍去手植嘉樹茂密成林望墓而扁其
樓曰陟岵手書蓼莪詩於屏寓終身慕爲孀姊卜隣
異宮同爨分甘折少教養孤甥及時婚嫁與季氏接
屋湛翁時兩家之狗相乳人比諸北平之猫安豐之
鷄云又爲季氏卜宅于鄉割土附益之購書籍製器
用必成兩部而分之時月詒阻憂念不寐魚果新味
專趾致之嘗書小宛詩於季氏壁交相勉戒仲姊切
於痛公率子姪而臨之盛暑斗屋熱鑠濕蒸治喪殫
誠送終無憾有族子從學者違瘍危篤咸勸其出寓

公曰彼以至親恃我吾何忍待以路人醫藥以濟之
時四隣癘氣如熾公家獨無恙人謂神明所佑云值
年荐饑斗直百錢公計總功之親戶與穀一碩仍做
義倉法春賑秋儲用備凶荒婦翁鄭公歿于公所穉
奠敦匠務愜情禮鄭公胤子繼亡公庀其終事靡不
用極音其兩孤與己子同業夫人雖歿恩愛如初是
爲公行治大略也少業功令庚午始中進士永感後
不復應舉用經史自娛儲書盈架游泳其中教子義
方以身導率乙巳六月十三日卒去其生丁酉爲六
十九歲葬龍仁器谷半月里丁未遷厝其上數武甲

坐地公系出潘南文正公諱尙衷平度公諱嘗兩世
大顯平度公有子諱畫錦川君選清白歷四世至諱
璨濟用監直長以文章德行著名昏朝金墉之變棄
官自靖生諱大相監察又歷兩世至諱鴻登亦以篤
行名一鄉陶菴李先生行鄉飲酒禮衆推公爲賓相
寔公曾祖也祖諱皖師事陶菴自律以小學四書考
諱師永生員亦種學績文妣海州吳氏載博女肅獻
公翻其先祖也婦德母儀俱爲世則公配迎日鄭氏
考濂生員左尹壽松其曾祖也奉夫子順事舅姑謹
闔政大小無不中度內外宗族稱之生于丁酉歿于

丙戌始葬水原台村遷附公之新墓舉一男宗英宗
英男聘壽公天資明敏孝友天植喪祭盡其哀敬粢
盛籩豆之需別儲一所新物未薦雖他人所饋不食
被服儉素或至垢弊而齊日必澡沐服新婢僕亦蠲
潔供事常戒家人曰爲宗子者纈多零替損福致咎
以不克致誠薦獻也經營緬事位置墓田凡百費用
不資宗物約已裕人凡有喪葬賴以經紀者亦未易
一二數也公貌端脣清鬚髮颯爽常若有遺世之想
嘗以新恩例拜聯姻達官其人當路示意勤摯而公
謝不再往其遠勢利者類此不妄交久而愈敬苟有

言行不顧者不與之言客至杯酒慙懃而溫克自持揚挖古今不爲危言激論亦不隨俗渙忍以故人莫不畏服嘗訓胤子以論語曰欲適時措之宜須讀論語乃可耳工於筆札亦不取妍芴究天象地理而不信雜術雅言葬親擇地求必山水翕聚爲人子者不可不知也嘗頽其齋曰存養又扁以守靜是爲公自修之實也子夏云雖曰未學吾必謂之學學者實心實行如公者幾希彼循名而忘實者詎不有愧於公哉或以公之善未獲報蘊不克施致憾於司命然孝悌是人之良貴萬善百行之所從出也公於是焉盡

分非圭組軒冕之所可同者也昔人有云雖積萬鍾繫千駟死之日曾不得與斯人之徒隸齒豈不信哉不佞稔服公行義公之孫聃壽又從余遊將親命抱家狀謁銘苦切屢辭以瘡朽垂死而其懇彌篤遂力疾而敘之辭之以銘銘曰

士立其大曰維守身末路靡靡鮮克自珍疇若我公德行恂恂奕世聞望迺篤其仁劬燾之理其化惟醇恪慎克孝無競伊人居家之政儀式鄉隣孰云未達厥聲孔彰屹彼月山修士攸藏從以碩媛合德齊芳淵丘雖易死穀偕臧子孫惟肖責報者長嗟哉後人

徵此銘章

襟溪李公墓誌銘

并序 ○ 戊申

襟溪先生李公既卒而葬兩胤勉愚大愚以直弼嘗
知遇於公獲屬以玄堂之誌直弼曾與公約以先死
者爲誌如馬范古義而仍念賤齒加於公數歲則必
先公而死我死後無復知公者欲爲公述生誌公亦
領可文未及就而乃經大存沒矣今宜亟踐前約而
以直弼之愚常恐知德有未悉而言歸於苟以之天
星奄一周天顧今瘡病垂死風燭將及又恐斯事永
休遂力疾而敘之曰公諱鳳秀字子岡延安氏遠有

代序爲世名胄至相國文忠公諱廷龜冢宰文靖公
諱明漢宗伯文肅公諱一相三代典文衡德業載國
乘不須譜也文靖公季子靜觀齋先生文貞公諱端
相始以道學顯文貞公有二子諱喜朝大司憲文簡
公號芝村克紹家學爲世宗師諱賀朝縣監 贈吏
曹判書判書公取文肅公子監司諱海朝子縣令
贈贊成諱崇臣爲嗣贊成公又無嗣取文簡公子大
司諱諱亮臣之子判敦寧 贈頌議政孝貞公諱敏
輔爲子孝貞公生吏曹判書文簡公諱始源文簡公
娶清風金氏郡守 贈吏曹叅判安默女以 正宗

二年戊戌三月十八日舉公公胚胎前光生稟異質自幼不離典訓說無勦行無跋見者咸稱將爲成德君子六歲始學曾史解棘聲如迎刃不煩提督而文理驟進甫成童已博通羣經稍長慕靜觀芝村家學正傳取性理諸書閉戶潛繹正廟聞公好學特賜近息錄獎勵隆摯服事族從祖中洲文敬公直輔始自經傳名理以至處世大方靡不講質又從遊于潁西任公魯老洲吳文元公熙常諸賢咸期望綦重折輩行待以少友亦嘗會講小大學于疇巖李公義秉所討論明暢一座聳聽時纔弱冠也間以親命赴乙

丑增廣試中生員未唱名隨文簡公赴燕服勤左右默察匙箸憂喜形于色如沙溪之於黃岡及歸不以一燕物自累象舌輩皆稱創觀云壬申除翊衛司洗馬陞侍直歷活人署別提司憲府監察儀賓府都事丙子出爲宜寧縣監丁丑移公州判官道伯以民願狀請仍任遭長子喪解歸拜監察不就己卯除翊衛司翊衛戊寅儒選有命廟剡屬公公力辭乃己庚辰拜義城縣令周歲棄紱又拜翊衛敦寧府判官掌樂院正并不就丁未二月二十二日感疾卒于芝山正寢壽七十五月戊午葬于楊州馬鳴洞良坐從先兆

也元配清風金氏敦寧府都正命淵之女間範克備
生後公一年歿先公五十五年繼配青松沈氏學生
獻之之女有高識婉德濟以才器公稱以良轉運生
先公二年歿先公十四年生三男一女男顯愚歿勉
愚出爲季氏后大愚女適進士吳敬善大愚一女幼
公豐貌偉幹敦厚溫潤祥和之氣布濩四體覲德者
如飲醇醪不覺其心醉也自在冲蕤子職甚修被孝
貞公鍾愛侍寢將命應酬文字獨任其勞孝貞公常
悶其偏苦曰靡一事拂吾意事親以養志爲主先意
承順文簡公歷官中外公隨事獻規非直爲囊篋之

助文簡公亟稱其孝臨事必詢可否而凌焉荐罹鉅
創居憂盡禮彌嚴於服闇之戒守制丙舍晨夕展墓
風雨不廢攀栢哀號聞者嗚咽毀瘠爲病而飲食猶
不從權幾致滅性喪畢每哭諱如袒括以文簡公暴
疾不救未承遺命爲至慟巾几所莅手澤所存寶惜
護持惟恐毀傷尤謹於追遠雖甚病不使人攝事關
祀享細微不校於心竟日悒悒若無所容故家人惴
惴莫不慙謹始文簡公祔葬于先壠公常謀遷窆夢
文簡公握一劑水賜公及啓壙水患孔酷人謂精誠
感通事季父致政公如父蚤往問寢及致政公墨世

禍謫遠島公年垂六旬力疾往省到海而幽音至以
罔及拜訣爲畢生恨常以事親者事姊氏檢其疾病
醫藥日用計活一齋之美未進乎姊氏則不敢嘗庀
喪葬靡有遺憾育甥姪俾底成立甥姪夭而遺孤患
痘疹日將醫往診霜雪凝馬首而不知疲與季氏因
心友愛同爨共財殆不知爲二身及被譴南遷熒熒
然無一日之樂枕上涕淚感泣徇人弟婦夙抱貞疾
殫誠救護四十年如一日文簡公按畿輔時椿俸餘
錢爲千緡將有需而未及命公遺從弟尸宗祀者曰
先人常恨宗家無祭田殆爲是也文簡公判騎曹時

有軍官廳貨之亦近千金與從弟未析箸者曰先人
念爾貧無以爲家遺意必在斯也以至踈親遠族罔
不曲盡恩意死喪憂患躬往存恤大宗孫違癘死人
無敢近者公往莅其喪與諸宗合貨以庀之宗婦又
殉公時在嶺邑專力以當終事是皆孝之推也接人
以誠無賢愚貴賤咸得其歡而若有機權表襮行己
鄙悖者辭嚴色厲如將挽焉由是取怨而亦不悔曰
人之好惡各於其類故聖人好善而惡不善彼之訛
我亦可見我之爲我又服失言失人之訓未嘗苟譽
而見有真誠向學者虛心愛慕忘年德之尊獎詡之

不暇但雅尚謙挹重以畏約不欲以師道自任止四方學者而苟有是心來者雖黷蒙必問以恠恠反覆開導素慎文際晚又塞兌息影斷絕過從惟於襟期所存則泐然無間也公蚤自傳身身世兩忘而忒有滿腔熱血每念 王室孤危邦本垂蹶痛癢切肌至於泣下及處 宮僚每進講援引古今傳行文義悃悃款款純誠孚感僚席所陳或乖經旨必加駁正左右皆竦聽曰真講官出莅宜寧值頻歲大歉殫心撫摩招徠流散蠲除積逋未周歲而民安堵如舊政聲播聞至有願受田爲氓者賦歸涕泣攀轅至不得行

義城地大局弊俗且獷悍健訟簿書如山而劓煩理劇剖判如流沛然若無事也邑有火田稅爲營邑所私者公曰公用固不可闕忍肥己乎并蠲其納納于營者割廩而補之民鼓舞如更生曰開邑後創有也吏道糴巨萬掩置既久公曰不蠶此將無邑徒施桁楊何益乃畀饒任籍其稍食以償之不數年而充完留心儒化擇宿望爲講長俾任道迪月設講會舉往若行治及成已成物之方發策以諗其學髦譽興奮絃誦之聲洋洋四境及歸士民豎碑以頌德兩邑之政在公爲大德之川流也居恆晨起謁廟退展方冊

整攝衣冠欽欽如也日有程課有故黷廢后必追補
曰不如是無以接續將去自奉菲薄食無擇味被服
少涉華侈不翅如泥塗沾體亦不服垢弊自異於俗
老不近輕煖曰與其安於體不若安於心居室故取
隘陋而圖書位置秩然有序庭宇明淨無點塵治家
有度井井不紊曰自家國而至天下之大皆是道不
克康濟一身何事可做嚴於辭受一毫不苟取一芥
不妄費而至富施處傾困倒廩不計有無痛宗家貧
窶每遺物助祭興言必太息教子先德行而後文藝
曰士當以見識爲先彼不識內外賓主之別甘心汚

下醉生夢死者摠坐於見識不到文章雖小技不本
之理義則無用之空言何與於身心又曰羣經及濂
洛諸書何莫非作聖之指南而剖判義利一刀兩段
莫若孟朱書政好今日多讀也御僮僕均勞逸軫飢
寒達其事情撫恤腫篤推之鄉黨皆感恩服義焉公
雅懷遐遜文簡公嘗葺墳菴營建祠屋曰吾兒非役
志於塵曰者吾以此遺之自弱齡見知於家庭者如
此中歲祿仕棲遲城闈爲避遠標榜晦身枳棘而亦
未嘗終三年淹也居洛名其亭曰大隱歸靈芝山中
堂前有雙流如交襟學者稱襟溪先生公以不世英

睿之資纘家傳詩禮之業夙有得於求仁爲己之方而天分既高充養有道故不勞克治而查滓渾化逮其晚年造詣幾乎明通公溥造次顛沛泛應曲當自然之中繩墨森嚴苟不固至德凝道亦何以與此哉如公者庶幾安且成者也始孝貞公德邵位崇兼有三達文簡公以文學名義受知 健陵與季氏致政公迭居清顯門闡隆赫公妙年已負盛望爲世重輕取一第易如拾芥而飄然霞舉身全名完禍網彌天而冥鴻不弋其不亦知幾其神乎雅意經濟斟酌古今揣摩當世識慮洞徹懸判其是非得失鑿鑿符合

舉而措之無施不周而沒身卷懷俾其鋪舒皇王之志不少概見惜哉爲學越自弱冠用志不分卓然以聖 自期必極其所欲爲而後已爲學節度壹遵洛建成法沒世鑽研而其默契於言意之表者得於考亭者爲多旁及羣書靡所不讀必要窮天人之理極事物之情以至三才萬變而淹涵貫穿燦若掌紋馴致博約兩盡體用圓融徐趨闊步獨造昭曠之原精粹之氣積盛而達卽其符采之彪外者也爲文章不屑作家而自中軌範尤長於書牘雖連篇巨牘操紙立寫不事點竄而辭理俱臻往往筆頭有舌滔滔莫

禦若是者真可云辭達也性不喜著述述亦不收曰
發前人未發則可立言垂後否則贅也只資人塗壁
耳農巖以靜觀先生爲文肆筆略不藻飾謂其勇過
於辭爵祿公於先生悅服鑽仰自其立心制行行休
進退靡一不契於遺矩此事亦繼述之一端也昔司
馬溫公言吾與范景仁姓不同兄弟不佞與公勝冠
結交至于耄及相須如一身非直如兄弟異體且范
馬猶有鍾律之求而吾兩人心心相照無一言不相
契自哭公來俛俛然如影失形皓首窮山涕不勝收
仍念知公之爲公者歷選并世惟我在耳始以齒友

而終欲起拜而師之今乃述公之德矢辭泉扃而苟
或其溢是負平生之知己也後之讀斯誌者知公之
爲不世出之真儒則幾矣銘曰

左海世胄奕赫延城振振名德藝苑主盟文貞文簡
以儒宗名維公鍾毓丕闡家聲卓乎有立仁孝高明
學貫天人行孚家庭表裏澄澈洞我中扃積久暉吉
渾然自成不資師傳洞見大原心與理會何用立言
寤寐誦法紫陽緒論乃所矢願必學聖人沉潛理藪
悟解絕倫韶音令辭矯若龍鸞貞固隱括素履乃安
韶光斂耀用自存身泥塗軒冕富貴浮雲玩心昭曠

周邵與羣敬枕岷巖永謝世紛百劫幻化桑海風輪
公則自在各實彌純峨峨芝岡千仞其尊人皆仰止
如詩好仁昭朗令終有光斯文有不可傳大化冥茫
馬鳴之山儼若斧堂神期如存騰有晶光我庸作銘
納于玄窔矢無媿辭仰累公眞

宗簿寺正黃公墓誌銘

并序○戊申

我 正廟以聖神之資任君師之責仰述 列朝之
志首建奎章之閣選一世才俊而儲養日有課月有
試以歲計而品其高下用盡作成之妙菱山黃公諱
基天最被 知遇將擬獎用而不終惜哉公朗慧成

性六歲述古詩有鳳凰飛長天麒麟遊野邊夫子生
尼丘古今稱聖賢之句時稱神童稍長業功令援筆
立就每赴試呈券第一屢蒙拔擢 天褒隆重壬子
中司馬應製被選 命舉面諭曰爾詩駟騶驪騶騶
騶駟此法出自何處對曰依樣急就章而爲之 教
曰爾是武家子而能文乃爾其特賜酒滿酌仍 教
曰爾善書又滿酌賜飲因令入內閣賡 御製賜周
軸以行草書進 上屢稱奇筆癸丑秋到記居第二
到記 賜第例取一人而 特教曰此券素知實才
命赴殿試及放榜 召見曰假使公卿無意用汝予

豈忘汝甲寅被文臣抄啓冬 命進百句賦禁漏未
數點而就 御批曰一院咸聳衆膝齊屈如許奇才
設選後初見試券騰示洋儒又 教曰出六後當有
器使之道預令銓曹知悉仍 教曰雖謂之八又佳
手未爲夸情賜唐宋八大家一部乙卯 謁寢園
變命寫儀軌 特命公與曹錫中管其事夜半八侍
上開戶起立問曰曹耶黃耶筵臣對以黃某 上曰
此是黃庭堅也又承 命製進七言排律五十韻八
刻而成一日寫二萬字板本 上嘗呼寫時弊策敲
推字句 命公獻可公有陳則輒 教曰爾是白樂

天之老嫗也戊午考兵使公以龍川倅失囚配金城
命改以畿邑異數也及印進儀軌 教曰黃某以前
後同叅之人不得預會 特放其父黃某卽命來待
文臣抄啓年四十者例減而於公 特教勿減賜毛
浮一卻曰雖獎予所常藉爾其寢坐聞者莫不聳動
以抄啓講畫居魁陞六品 親政命擬入銓卽未經
臺銜直拜銓卽往例所罕也已未遭艱累遣閣吏存
問曰常常係念爾其知否庚申 特賜米魚及饌需
前後匪頒及禁廚珍饈不可勝記 正廟昇遐公號
絕移時哀痛擗踊如不欲生血淚霑襟終喪如一日

語及 先廟聲淚俱發辛酉差問事郎屢叅試園成
稱神鑑壬戌出監江東縣治最一路乙丑差 正廟
實錄郎廳歷正言持平掌令宗簿正丙寅以不叅金
相達淳合啓配龍川未月移配古今島己巳 翼廟
誕降赦宥庚辰敘拜慶尙都事一謝 恩命此爲公
出處大略也公字義圖昌原人菱山其號也其先出
自中國以高麗侍中諱忠俊爲始祖八 本朝世襲
簪組至諱瑋以奉教忤於時出補評事而終 贈都
承旨生諱立中郡守 贈叅判三傳至左叅贊諱一
夏 景廟辛壬凶黨竊柄 貳極傾危抗章逆折禍

機識者謂 儲位全安此疏爲有力云是爲公高祖
也會祖諱有師 贈叅判經壬寅士禍絕意進取祖
諱案考諱仁煥兩世俱兵使妣驪興閔氏水使百福
女也諱仁照延安李氏會祥女公本生父母也公以
純廟辛巳八月二十日卒距其生庚辰爲六十二歲
祔厝于廣州先塋丙申遷于牙山兄弟洞癸坐配咸
平李氏其考兵使膺運也先公一年生歿後公五日
祔公墓左舉四男二女男鍾最鍾粲鍾罕鍾漢女適
李建權用奎生員鍾最子鶴淵直淵武科女金顯培
鍾罕子守淵鍾漢子愚淵公生稟異姿迥越倫萃自

髻鬣洞透文竇長篇巨章罔不走毫而成精爽飛動
若有神助藝苑諸公口呿而退三舍名震一世流入
中國浙江吳瑾贊曰其氣逸而暢其韻工而穩天分
優人工極江南孫衡贊曰蓄道德而能文章當藏之
名山待之其人芴通書藝篆隸準以石鼓孔碑楷法
鍾王草得張旭懷素之妙龍跳虎臥變化萬態千紙
百軸俄刻揮灑勢如風雷徫觀失色華人程叔甫寶
藏曰抑之則侔懷素獎之則壓右軍千載不磨之書
也著述甚富而散逸不收有零藁藏于家昔淮南崇
朝而賦騷枚皋應詔而成賦子建接牘如口宣仲宣

舉筆似宿構阮瑤據案而制書禰衡當食而草奏斯
爲名世而如公聰敏當與之拍搥不讓一頭豈不誠
曠古逸才哉公謹厚謙恭養素守雅與物無忤過惡
揚善不伐技能不求聲譽明察義利片言剖析每閱
經史十行俱下過眼輒誦百家九流罔不貫綜而好
讀論語三禮周易春秋探賾發微心目俱臻居恒閉
門却掃手不釋卷其內修純篤皆本之經術祇許公
以絕世詞藝者洵淺之爲知也噫天降時雨大化流
行草木甲坼禽鳥飛躍斯爲聖人之叅贊化育者也
公生丁奎運受知 明主若將大舖鴻藻用應黼黻

笙鏞之需優優乎有餘地以鳴國家之盛而未及進
用如蘇軾之於神宗蘇軾終致隆顯而公則中罹世
禍嶽崎坎壤不少槩見豈非命耶然 宸袞輝映華
錫聯翩遭逢之榮成就之 恩歷選諸彥未之或先
是可以藉手而見古人也不佞講服公盛名而竟違
一面爲畢生恨鍾罕謁幽堂之文亦已積歲常恐風
燭奄及罔副願言遂力疾而爲之銘銘曰

才爲德用不然其難靈華亭毓生材克完偉哉黃公
其器槃槃聰穎敏給筆花煊爛玄圃積玉幽谷艷蘭
比古神中勃泓融粲文苑儲望咸推登壇遭遇 聖

主喜動

天顏校書石渠獻賦金鑾英華倣發寵冠
羣班七日隱豹遇霧成斑九苞祥鳳應律和聲功用
方與天衢雲程時運不諧坦步失平以義處命憂患
素行百不一試遵晦終生何用不臧克完身名瓊瑤
玉佩收聲琤琤璧宿晦彩大化冥冥節彼仁山斂却
英靈 恩言不泐洞徹幽明我述銘章垂千百齡

贈童蒙教官畏庵鄭公墓誌銘

并序

塞天地橫四海者惟孝孝始愛敬終極哀思厥亦多
緒其心一焉至若不忘讎不愛死達理而聞道者其
惟鄭公諱允喬乎生年十八本生父橫被尹姓女誣

陷死於桁楊公直欲手刃讎賊視死如歸而念所後親老兩弟俱冲藐忍痛含冤遵晦以自廢不出戶庭不見天日讀春秋講復雪之義輒流涕且鑄利刀藏身十六年如一日及親沒而克襄弟長而有嗣遂與兩季搜尹女刺殺投官請罪矢志以朝復讎夕就戮累月縲紲備經痛毒鄉人士齋籲嗚冤道伯元文敏公仁孫會五邑宰審理而釋公是日即丙戌五月十九日而公之生朝也時久憫旱忽大雨滂沱是可驗天人感應捷於影響也昔人云以戴天爲大恥枕戈爲得禮即死無憾守禮而行義者公實有焉於乎休

扶公字大選東萊人以高麗左僕射諱穆爲鼻祖珪組奕寫入本朝有諱守弘吏曹判書即公十世祖也生諱任進士始移金堤子孫世居屢傳至諱世英諱東赫諱天基是爲公三世妣青松沈氏諱天培及羅州羅氏即本生父母也公享年八十九而卒于辛巳五月二十九日墓于同郡大山西坐配晉州姜氏必輔女生先公一年歿先公十九年墓在雉石卯坐舉二男一女載鼎載和女適文缺載鼎繼子奎完載和子奎五奎完三子秉朝根朝寧朝奎五二子燦夏相夏公天資近道纔純傳悟解微奧曲暢旁通歸

對萱闈如誦已言讀會傳序俗儒記誦詞章之句喟
然歎曰詎誦詞章非真儒也遂謝絕進取專心問學
卓然以聖哲自期言動舉止壹遵九容九息性於孝
躬漁樵供甘蠶至誠孚達人皆歆動晨謁家廟齋沐
承祭不以耄耄而廢焉與二弟同寢食不須臾相離
以致闈壺肅穆鄉隣感化皆孝之推也遍交并世羣
儒服事櫟泉性潭兩賢被其獎誦焉取三畏之義顏
其室曰畏庵學者稱畏庵處士有零稿行于世夫孝
者百行之源萬善之本而公爲父報仇發於天性志
在殉身本無求生其生也幸耳公乃所願學聖人不

欲以一善成名然冤酷理極必要其致命遂志者在
公爲大節餘皆可略也朱子有云活孝悌死孝悌公
所成就者活孝詎不是學問功大乎 朝家始焉給
復終又 贈童蒙教官是靡足以獎孝然公則無所
爲而爲詎恤身後之名哉後人之以褒旌重輕致詰
於秉化權者非所以尊德也錫夏哲夏從余遊謁公
隧誌余既述文弁遺稿更無餘辭可以發潛闡幽而
竊感公行治力疾而爲之銘銘曰

孝爲民行天經地義深愛推極用備五致服勤無方
報生以死闔不反兵聞諸孔子嗟嗟鄭公踐述斯理

俟時而發克遂厥志趙娥梁悅異世同揆其亦庶幾
義盡仁至在家孝子爲國賢士本之學問有終有始
節彼大嶽宰木巍巍我庸闡微納銘玄隧名德俱完
永垂千禩

義菴閔公墓誌銘 并序

粵我 端廟乙亥運屬陽九忠臣烈士非捐軀致命
則皆桁楊瘡痍脫燔穹之災者亦遯世避舉用自靖
獻雖所遇不倫或死或生而其義一也當時事史多
闕文故顯晦隨以差殊有若義菴閔公其所樹立無
間於生死六臣而世無稱焉余竊悼焉公諱懷參驪

興氏顯于麗朝文景公諱令謨文仁公諱漬最著入
本朝有判典校令諱中立三陟府使諱紹生同知中
樞諱孝源卽公三世也同樞公娶咸陽朴氏奉禮奉
女舉公公天稟貞確好讀書至往哲成仁取義必掩
卷流涕 景泰壬申中進士舉遺逸拜司憲府執義
定順王后考礪良府院君玆壽公之姑母夫也公戚
姻 王室爲朝野所倚重時 端廟冲齡嗣位諸大
君強盛公見國勢岌業常懷憂懣乙亥 端廟內禪
公遂免官家居及六臣禍作公息影飲泣恨不與之
同殉丁丑有金正水者希當路旨告宋玆壽權完謀

逆降封 上王爲魯山君遷寧越尋 昇遐鄭麟趾
等請宋玟壽處絞以公之爲宋公妻黨請施一律
世祖特命減死外補大靜縣監 上王舊臣無遺類
權宋閔三家被禍彌酷公兄懷曾弟懷哲并竄公莅
縣日飲醇酒不視事牧使報罷公不就京第卜築于
緩山之月谷頽其室曰義菴出處動靜皆律之以義
成宗朝累徵不起遵晦巖以終其身與縣監文公
自修 贈承旨梁公以河契好甚篤且與之裁定鄉
約農社儀節爲一州章程世謂三人社子孫仍家焉
純廟戊辰鄉人土建祠于月谷與文梁二公并享公

配咸平李氏生員仲河其考也有三男二女男息點
副司直希點忠順衛繼點縣監女適忠義衛辛禹卿
同中樞李宗仁公墓于緩州南一面蔓芝山亥坐夫
人及三胤俱耐嗚呼公及見 天位傾覆齋恨罔極
如不欲生自放於窮山絕海之間沒世而無憫豈所
云遠不違君死不忘國者耶公旣沉淪自晦而世亦
靡所聞揚俾其姦節徽闕而不章是爲可惜然公
所自靖是不可已者豈要身後之名哉世代浸邈文
獻不備資歷行治有不可考然逾略而逾可信也公
後孫胄顯成鏞謁幽堂之誌累辭以瘡病而厥懇苦

切夫樂道人之善用傳諸後立言者之事也不佞豈
其人哉然服公之義感生之誠遂力疾而爲之銘銘
曰
維 莊陵世事至難言辭微跡泯莫泄幽冤考公終
始盡君臣義生死六臣殊塗一致鄉邦所式子孫所
似肆崱芝岡秋栢不死我闡潛德納于玄隧匪直昭
公用警千禩

梅山先生文集卷之四十

